

Usomhi Onete oyi iJesu iKirisiti ni IMaki O keke

*Itsabo oyi iJoni Oni oọ batazi egbo
(iMat 3.1-12; iLuk 3.1-18; iJon 1.19-28)*

¹ Ona o khi igbaekele oyi usomhi onete oyi iJesu iKirisiti Omi Eshinegba. ² A keke oli shi Ebe-nopfuase ni omekeguele oyoli ni a lu Azaya o keke. Ni Eshinegba o la lie,

“Mhi ya ghie aghiusomhi
oyemhe ralo ne.

Oni o ya be ode
shi eke khe.”*

³ “Ogbo o la odagbe
e pfi okokokhue. Oo lie,

‘A ri ele ode
shi eke khe Onomhue,
ni o o bhale.

Ri ele oni ode sheshe
ni o rote.’”†

⁴ Igho IJoni o li bhale, oọ batazi egbo obini odagbe ifufu, oọ tse abo, oọ lie, “A mu pfi lase olamhe eye e le bhale deba Eshinegba ini a ri olamhe topfa e.”

⁵ Igho egbo e rote eke iJudia ali eoli iJerusalemu le deba IJoni. Ee zono olamhe eyewe ye oli. O la oke iJodani batazi egbo. ⁶ Ode ni a ri iriria eyi alakumi do, iJoni o ro fia itsua so. O ri eku e ri ele ogbene mu oku. Initso ali oribo e khi eminale

* 1:2 Li ze iMala 3.1 † 1:3 Li ze Aza 40.3

eyoli.‡ ⁷ Abọ ni ọọ tse gueye agbọ khi: “Ọmọse ni ọ ke ya bhale eḗlese ode ukhokho oyemhe, ọ fu dose mhe, ọ mholi ekpabọ dose mhe. Mhi aa fu ramhi oni ọọ taghie uli ni o la ekuẹ ni ọ sọ-a. ⁸ Amẹ mhi rọ batazi e memena, ama Ayemhe-nọ-pfuase ọ ke rọ ya batazi e.”

Ibatazi ali imufe oyi iJesu

(iMat 3.13--4.11; iLuk 3.21-22; 4.1-13)

⁹ Oa te agho tесе ne, ni iJesu ọ rọ rọte iNazareti ni o la eke iGalili bhale ni iJoni ọ la oke iJodani batazi ọli. ¹⁰ Abi iJesu ọ rọ lese rọte elemhi oke ji egbe ngale te, ọ me khi idane ọ khueghie. Ayemhe oyi Eshinegba ọ li abi anekhukhu rọte idane tiemhile ya ma li egbe. ¹¹ A suọ khi uruli o rọte idane ngme tiemhile, ọọ, “Omimhe ni mhi nono ingme oyoli u khi. U ma ri egbe e mu mhe gba.”§

¹² Utoghuokpe, Ayemhe oyi Eshinegba o rue iJesu je odagbe. ¹³ Ogbelẹ egbhueva ọ la oobọ. Okphaghie, ni ọ khi oghie ayemhe ebe, ọ mu ọli fe. IJesu ọ nu elamhako la oobọ, ama igeni eyi Eshinegba e ri ukpeloe e khu ọli.

Eniye odukhokho eni odode ni iJesu ọ ze

(iMat 4.12-22; iLuk 4.14-15; 5.1-11)

¹⁴ Abi a rọ mu iJoni shi owa ighumha se, iJesu ọ je iGalili ya tse abọ usomhi onete oyi Eshinegba. ¹⁵ Oọ lie, “Oni eghẹghẹ o she bhale, Eghiele oyi Eshinegba o she ti mama awa. A mu pfi lase olamhe eye e le, ni a mie oni usomhi onete suọ.”*

‡ **1:6** Li ze 2 Ighie 1.8 § **1:11** Li ze Igbae 22.2; Iwolo 2.7; Aza 42.1; iMat 3.17; 12.18; iMak 9.7; iLuk 3.22 * **1:15** Li ze iMat 3.2

¹⁶ Abi iJesu o rọte epfepfe okẹ oniemi oni o khi shi, na lui iGalili kia lẹ, o mẹ iSamọ ali inyoghuo ọli Aduru. Egbifele e khi. E pfi aga lo elemhi oni okẹ, ee gbe ifele. ¹⁷ IJesu ọọ wẹ, “A deba mhe, mhi ya sese e abi a ke lie ke ti egbo gbili.” ¹⁸ Aghoagho e ku iga eyewe shi eke, e deba li.

¹⁹ O ke te agho je odalo denẹ, o gbo mẹ inyoghuo etuava, iJemhisi ali iJonni imi iZebedi e la elemhi oko-okẹ oniemi, e zu iga eyewe. ²⁰ Abi iJesu o rọ lese mẹ wẹ, o lu wẹ e deba lue, aghoagho e pfi itawe ali egbo ni e nu wẹ ye shi elemhi oko-okẹ oniemi, e deba li vu.

Ijesu o khu omose ayemhe ebe egbe-a
(iLuk 4.31-37)

²¹ IJesu ali eniye odukhokho eyoli e bhale ọli iKapanomu. Ogbelẹ iyemhea ni o ke deba li, iJesu o dose lo elemhi owa ugamhi, o la agho sese. ²² Ori abo sha egbo ni e ri eso kpe abi o li sese, itobo khi eri o sese egbo abi o gbo ni o lese emini ọọ sese, osese oyoli o kioda shi oyi eni e sese Ishi eyi iMosisi.†

²³ Utoghuo kpe omose ni ayemhe ebe o la egbe, o lo elemhi oni owa ugamhi le. O tsesẹ gbaa! Oo, ²⁴ “Elo wa nono anye egbe, iJesu na iNazareti? Eri u bhale ya pfuse anye-a? Mhi ga lese oni u khi. Oni O pfuase oyi Eshinegba u khi.”

²⁵ IJesu o dese oni ayemhe obe, ọọ li, “Guese unu pia, te ọli egbe lase le.” ²⁶ Oni ayemhe obe o nighise oni omose, o mu ọli pfi gbe. O pfi okokokhue, o rọte oni omose egbe ya lase.

²⁷ O ga ri abo sha egbo nya. E mhila egbe wẹ, “Onoghuo na? Osese onogbo ni o mholi ekpabo!

† 1:22 Li ze iMat 7.28-29

Eri ọ ga nu ayemhẹ ebe ẹ ngme, e ga suọ esọ na li.”
²⁸ Aghoaghọ ingme oyi iJesu o gbe eke-a asha kpa eke iGalili.

Ijesu ọ ri ebubu ẹgbọ ze
(iMat 8.14-17; iLuk 4.38-41)

²⁹ Ijesu ali eniyẹ odukhokho eyọli, ghe iJemhisi ali iJoni, e ga rọte owa ugamhi fiẹ lasele, e ya je apfẹ oyi iSamọ ali Aduru ³⁰ Ọgọ iSamọ oni ọkpotso, ọ yeshi ghua ughuamhi iba. Ijesu ọ lẹsẹ ramhi aghọ, a gue ingme oyọli yẹ iJesu. ³¹ Ighọ ọ lo deba li, ọ mu ọli obọ, ọ mu ọli ukpho vule. Ighọ eni iba e lase ọli egbe le. Ọ fẹli wẹ pfẹse.

³² Ẹlogbomhi ẹlẹghọ khi ovọ ọọ tiemhi eko, ẹgbọ e tsua eni ẹa ze, ali eni iyemhẹ ọkphaghie e yeshẹ ngme bhale ghi iJesu. ³³ Ẹgbọ nya ni e la oni ẹoli e le gba odalo oni owa. ³⁴ Ijesu ọ ri eni ẹ ghua, ighuamhi khi ighuamhi, ze. Ọ khu ayemhẹ ebe ebubu ẹgbọ egbe a, ama ọa zẹ ni eni ayemhẹ ebe eghọ e ngme emhikhoghuo unu lasele, itobọ khi e lẹsẹ oni ọ khi.

Ijesu ọ la iGalili tse abọ usomhi onete
(iLuk 4.42-44)

³⁵ Ogbiẹ-fiefie ogbeakọlọ khi obili ọa pfo ogbe ne, iJesu ọ fiẹ lase je ashini o da-ya, ọ ya sọ iromhi. ³⁶ ISamọ ali apfọli ni e kpọle, e vu ya nono ọli. ³⁷ Abi e rọ mẹ ọli, ẹẹ ọli, “Ẹgbọ kpa ẹẹ nono ẹ.”

³⁸ Ijesu ọọ wẹ, “Awa mema ya je ẹoli oboese, ikhi apfẹ eni e timama akana, ni mhi li la oobọ tşẹ abọ, irari khi ona o zẹ ni mhi rọ bhale.” ³⁹ Ighọ ọ kia gasẹ eke iGalili nya tse abọ. Ọ la owa ugamhi eyewẹ tse abọ. Ọ khu ẹgbọ ayemhẹ ebe egbe ku-a.‡

‡ **1:39** Li zẹ iMat 4.23; 9.35

*Ijesu o ri oni efafe e mu ze
(iMat 8.1-4; iLuk 5.12-16)*

⁴⁰ Omose ni efafe e mu o bhale deba ijesu. O wugha li odalo, o o lema li, o o, “Ini o ghole e, u dobe ya remhe ze, u remhe khi oni o pfuase.”

⁴¹ Igho elemhi o li, ee ala ijesu, o nise obo-a ti oni omose, o o li, “O ghole mhe, khi oni o pfuase.”

⁴² Aghogho oni efafe e lase o li egbe le, o ze, o khi oni o pfuase.

⁴³ Ijesu o gueye o li, o ke vu. O lolo tse agua ye o li, ⁴⁴ o o li, “Khi gue ingme ona ye ogbokhoghuo, ama le ya ri egbe e khashe ekpodalo-ugamhi eyi Eshinegba, ni e te okpe ne, ni u luase obo ni iMosisi o o a ke luase, ini a ri ogbo lina ze. Ishegho, ni o khi otsela na we khi u she ze.” §

⁴⁵ Eri oni omose o ri ochogho ngme o li kiakiala gboo, o miatse oni ingme onete ku asha kpa. Itobo ona, ijesu o a ke dobe lo eoli okhoghuo le gboo. Eri o ke la odagbe obini o da-ya. Abi o rie khi igho, eri egbo nya e kie rote asha kpa e bhale deba li.

2

*Ijesu o ri omose ni o guogho-a ze
(iMat 9.1-8; iLuk 5.17-26)*

¹ Ikuku ogbele e dose, ijesu o gbo lo elemhi iKapanomu, eni egbo e suo khi o she bhale apfe.

² Ebubu egbo e le gba ramhi ni ogbo a ke me ashikhoghuo ni o kpole, ya ramhi olase unu-ode. Ijesu o tse abo oni usomhi ye we. ³ Igho emose aane e tsua omose ni o guogho-a adigege shi iya bhale ghi ijesu. ⁴ Abi eni emose ea ro me asha

§ 1:44 Li ze iLev 14.1-32

tsua li lole ashini iJesu o la, itobo egbo ni e gho bu dose, e nga ukhomhi oni owa rote ashini iJesu o la gbese ekpha-a. Abi e ro gbese oia se, e ri ili ri oni omose tiemhile, abi o kie li yeshi iya. ⁵ Abi iJesu o ro me irudunga oyewe, oo oni omose ni o guogho-a, “Omimhe, a she ri olamhe topfa e.”

⁶ Ama eni e sese Ishi eyi iMosisi ni e shito akagho, e sa o udu oyewe, e lie, ⁷ “Elo o ze ni oni ogbo ona o ro ngme ungmehi onana unu. Eri o pfi unu-a! A li me oni o dobe ya gbe olamhe kua na ogbo? Oa khi Eshinegba lueghuo?”

⁸ Aghogho iJesu o she lese elemhi ayemhe oyoli emini e sa shi elemhi udu oyewe, oo we, “Elo o ze ni a ro sa usamhi onana. ⁹ Onoghuo o kele ne, ni a ro lie oni omose ni o guogho-a, ‘A ri olamhe topfa e,’ abi khi ‘Vule, rue iya oye ni u ke kia?’ ¹⁰ Mhi ya ro li khashe e khi Omi Ogbo o mholi ekpabo elemhi agbo ona ni o ro gbe olamhe kua na ogbo.” Igho o gueye oni omose ni o guogho-a egbo, ¹¹ “Mhie ye u vule, u rue iya oye, u ke je apfe.”

¹² Oni omose o vule, o rue iya oyoli, o la akpewe nya kia vu. O ri abo sha egbo kpa. Ee kueghie Eshinegba, e lie, “Anye ea kpe me onana ghue oo!”

Ijesu o lu iLevi

(iMat 9.9-13; iLuk 5.27-32)

¹³ Ijesu o gbo je epfe oko oniemhi ni o khishi. Ebubu egbo e bhale deba li, o sese we. ¹⁴ Abi o kia le, o me omionoga iLiva omi Afeusi khi o shito okhoho eyi eni e mie oga. Ijesu oo li, “Deba mhe.” Igho o vule deba li.

¹⁵ Abi iJesu o la ayi iLevi le eminale elogbomhi, emionoga ni e bu ali egbo ena olamhe e li nu oli

ali eniye odukhokho eyoli le emhi, irari khi egbo ni e bu e deba li. ¹⁶ Abi egbo eni ee sese ishi na lui iFarisi e ro me khi iJesu o nu egbushia ali emionoga e le eminale, e mhila eniye odukhokho eyoli, “Elo o ze ni o ro nu emionoga ali egbushia e le eminale?”

¹⁷ IJesu o suo onana, oo we, “Egbo ni e ze ea mhue emini e ri obo e li. Oni oo to, o ye apfe obo. Oa khi eni e pfuase ne mhi bhale ya lu, ama egbushia.”

Omhila ingme azumhi

(iMat 9.14-17; iLuk 5.33-39)

¹⁸ Eghẹghẹ oghuo eniye odukhokho eyi iJoni Oni oo batazi egbo ali egbo iFarisi ee pfi azumhi. Egbo eghuo e bhale ya mhila iJesu, e oli, “Elo o ze ni eniye odukhokho eyi iJoni ali enayi egbo iFarisi e ro pfi azumhi ni eye ea ro pfi?”

¹⁹ IJesu o so we o, oo we, “Se epfese eyi omose ni o rue omueshi onogbo e lie ke pfi azumhi ini oni omose o kie nu we shito? E a me asha pfi azumhi ini o kie nu we shito. ²⁰ Ama eghẹghẹ o ya bhale ni a ro rue oni odo oni omueshi vu. Eghẹghẹ agho, e ro tigbe ya ke pfi azumhi.

²¹ “Ogbo a ya khi ode onogbo gbela ma ode onodio. Ini u ligho, eri oni ode onogbo o ya nyanon oni ode onodio-a. O ke nyanon-a dose abi o kpe li.

²² Ali khi ogbo oa ya ku onyoo onogbo shi akpaba onodio. [Ikhi akpaba ni egbo iJu e ku onyoo shi.] Ini u ligho, eri oni onyoo o ya vese oni akpaba-a. Oni onyoo ali oni akpaba e ga li opfu-a. Akpaba onogbo a ku onyoo onogbo e lo.”

Onomhwe oyi ogbele iyemhea

(iMat 12.1-8; iLuk 6.1-5)

²³ Ogbeleghuo eḷe iyemhẹa oyi eḡbọ iJu, iJesu o rọte ifui ishemhi iakpa kia dọṣe. Eniye odukhokho eyọli e li nu ọli kia. Ighọ e li be eni iakpa.*

²⁴ Ighọ iFarisi e mhila iJesu, “Elo o ze khi eniye odukhokho eye eḷe riḷe emini a ghue eḷe iyemhẹa?”

²⁵ IJesu o so we o, oo, “Aa kpe me ọli ze Ebe-nopfuase emini Oghie iDefidi o riḷe abi okiamhi o ro gbe ọli ali eni e nu ọli kia? ²⁶ Eḡheḡhe ni Abiata o ro khi Okpeda na ekpodalo-ugamhi eyi Eshineḡba, ni Oghie iDefidi o ro lo Owa oyi Eshineḡba ya rue ibuledi ni a roḡ ga Eshineḡba le, o kholo na eni e nu ọli kia le. Ibuledi ona ighie eyi ekpodalo-ugamhi tse, ushi o lama e ke le we.”†‡

²⁷ Ighọ oo we, “Eri a ma ogbele iyemhẹa na oḡbọ, aa ma oḡbọ na ogbele iyemhẹa. ²⁸ Itobo ighọ, Omi Oḡbọ o khi Onomhue, li shi oyi ogbele iyemhẹa.”

3

Oḡose ni o ghu obọ oghuo-a (iMat 12.9-14; iLuk 6.6-11)

¹ Eḷeḷese khi iJesu o gbo je owa ugamhi, oḡose ni obọ oyọli oghuo o ghua, o la akaghọ. ² Eḡbọ eghuo e nono ashini e te ya me asha gue ingme shi iJesu egbe. E ri ukpeloe shi ọli egbe ini o ya ri oḡbọ ze eḷe iyemhẹa. ³ IJesu oo oni oḡose ni o ghu obọ-a, “Vule migha odalo oyi eḡbọ kpa.”

⁴ IJesu o mhila we, “Onoghuo o gbe akanya elemhi ushi oyawa ne eḷe Iyemhẹa? Ni a ro riḷe onete abi ni a ro riḷe onobe? Ni a ro tsumhi agbo oyi oḡbọ abi ni a ro pfuse ọlia?” Ama e tsaghiẹ a.

* **2:23** Li ze iDeut 23.25 † **2:26** Li ze iLev 24.9 ‡ **2:26** Li ze 1 iSam 21.1-6

⁵ Igho iJesu o ri elemhi ibibi bino we gasẹ, udu oyoli o yese-a shi udu obe ni e mhue. Oo, “Nomose nise obo-a.” O nise oli-a. Igho obo oyoli o gbo li abi o kpe te eke li ⁶ Igho egbo iFarisi e fie deba eniye odukhokho eyi Erodu, e ya gba ugbamhi abi e li ya gbe iJesu-a.

Ebubu egbo e deba iJesu

⁷ Igho iJesu ali eniye odukhokho eyoli e lase we iteva le ya je oke na iGalili. Ebubu egbo e rote iGalili deba iJesu. ⁸ Abi e ro suọ emini o riyele, ebubu egbo e bhale deba li, rote eke iJudia ali iJerusalemu, ali Idumia ali eke ni o kpe obo na iJodani ali epfepfe iTire ali iSidoni. ⁹ Itobo khi eni egbo e bu dose, iJesu o gueye eniye odukhokho eyoli e nono oko-okẹ oni ikeke ni loli lo o ini egbo e khi sha mu lue. ¹⁰ Itobo khi o she kpe ri ebubu egbo ze, egbo eni ea ze, e mise egbe ini e me asha ramhi oli egbe ri obo ti oli.* ¹¹ Eghẹghẹ kpa ni egbo ni ayemhe ebe e yesẹ ẹ ngme e ro da me iJesu ne, e de ya yeshi eke odalo oyoli. Eẹ tsese, eẹ lie, “Omi Eshinẹgba u khi.”

¹² Ama, o tse agua ye eni ayemhe ebe egho e khi gue oni loli khi le.

IJesu o ze ighiusomhi na ke ogbava (iMat 10.1-4; iLuk 6.12-16)

¹³ IJesu o nga ukhomhi ute, o lu emose ni e ghole oli. E bhale deba li. ¹⁴ O ya ze egbo ogbava ke, o lu we ighiusomhi na ke. O ze we ni e nu lue ke kia, ali ni lue me we ke ghie usomhi fie ke tse abo usomhi onete, ¹⁵ ali ni e gbo mhue ekpabo

* **3:10** Li ze iMak 4.1; iLuk 5.1-3

ni e rọ ke khu ẹgbọ ayemhẹ ebe egbe kua. ¹⁶ Ena e khi otuogbava ni ọ zẹ. ISamọ, ọni iJesu ọ lu iPita. ¹⁷ IJemhisi ali inyoghuo-ọli iJoni imi iZebedi (eni iJesu ọ ri akiseva iBonajisi na. Ni o migha shi Imi Akphala), ¹⁸ Ali Aduru, iFilipu, iBatolomiu, iTomosi, iJemhisi omi Afeusi, ali iTadiusi, iSamọ [ọni ije-odalọ oyi ẹdẹli iJu oo ghọ mu egbe.]

¹⁹ Ali iJudasi Isikarọti ọni ọ ri iJesu dẹ.

Ijesu ali iBezebo

(iMat 12.22-32; iLuk 11.14-23; 12.10)

²⁰ Ijesu ọ nyenẹ egbe je apfẹ. Ighọ ebubu ẹgbọ e gbo tigbili ramhi khi iJesu ali eniyẹ odukhokho eyọli ẹa mẹ asha, wẹ khi eminale e ya le. ²¹ Abi apfẹ ọ e rọ suọ ona, E nono khi wẹwẹ e ya mu ọli je apfẹ. Irari khi eri e liẹ, “Ujili o she ẹ kpha li.”

²² Eni ẹẹ sẹsẹ ishi ni e rọte iJerusalemu tiemhie, e liẹ, “Ayemhẹ iBezebo ni ọ khi Ọkphaghie o la li egbe yese ọli ẹ ngme! Lọli ọ khi oghie ọyi iyemhẹ ebe ni ọ ri ekpabọ na li ni ọ rọ ke khu ẹgbọ iyemhẹ ebe egbe kua.”†

²³ Ighọ iJesu ọ lu wẹ, ọ ri okhẹ irọkhokhọ nu wẹ ngme, Oọ wẹ, “Sẹ ọkphaghie ọ liẹ ke khu ọkphaghie?”

²⁴ Ini ushishi e kemhi egbe wẹ shi ikui-iku ni e rọ nu egbe wẹ ẹ khọli, eri oni ushishi ọọ de. ²⁵ Ini ọmhue-apfẹ o kemhi shi ikui-iku ni e rọ nu egbewẹ ẹ khọli, eri oni ọmhue-apfẹ o ya de. ²⁶ Ini ọkphaghie ọ mu okhọli vule shi egbọli ọ, ọa ya tọ, eri ọ ya de, ukpese oyọli o she ramhi.

²⁷ “Ogbọ ọkhoghuo ọa la ọ ni ọ dobe ya lo owa oyi ọmose-akama ya ti ọli itsua eke-a ini ọa kpe mu ọni

† 3:22 Li zẹ iMat 9.34; 10.25

omose-akama ge shi eke. Egehege agho, o tigbe dobe ti oli itsua eke-a.

²⁸ “Egbegbi ingme mhi gueye e, khi, aa me olamhe ni ogbo o lamhe ali ungmehi ipfiunu-a ni ogbo ya ngme, ni aa dobe ro ya gbekua na li.

²⁹ Ama onini o da ngme ungmehi ipfiunu-a deba Ayemhe-no-pfuase ne, aa ya ro topfa li, irari khi olamhe ona agboagbo o pfi obo lo.”[‡]

³⁰ Itobo khi e oli khi, “O mholi ayemhe ebe,” o ro ngme ona.

*Inyo iJesu ali inyoghwo oli eni emose
(iMat 12.46-50; iLuk 8.19-21)*

³¹ Igho inyo iJesu ali inyoghwo oli ee bhale. E migha oolase. E ghie ogbo o ka lu iJesu ghi ewe.

³² Ebubu egbo e shito gaso oli. E bhale ya gueye oli khi inyoli ali inyoghwo oli e la oolase, khi ee nono ni wewe e me oli.

³³ O mhila we, “Eghwo e khi inyemhe ali Inyoghwo-mhe?”

³⁴ Igho o bino eni e shito gaso oli, oo, “Enana e khi inyemhe ali Inyoghwo-mhe! ³⁵ Onini o da rieje emini e ghole Eshinegba, o khi Inyoghwo-mhe onomose ali onokpotso ali inyemhe.”

4

*Okhe irokhokho oyi oni o ko ikpamhi emhi
(iMat 13.1-9; iLuk 8.4-8)*

¹ IJesu o ke gbo la epfe oke ni o khi shi na iGalili sese. Egbo ni e le gaso oli e bu dose ramhi ni o ro ya lo elemhi oko-okeshito. Oni oko-okeshito o la elemhi oni oke. Eni egbo e ke migha egele eseso oni oke.*

[‡] 3:29 Li ze iLuk 12.10 * 4:1 Li ze iLuk 5.1-3

² Emhi ebubu ọ ri okhe irokhokho ọ sese we. Ọọ we.
³ “A ghe i! Oghiale ọ ya la ọ. Ọ fiẹ yá kọ iakpa. ⁴ Abi ọ li kia miatse eni iakpa, ikpamhi eghuo ọ e de kua ode, igho ipfeli e bhale ya sanọ we le. ⁵ Eghuo ọ, e de kushi eke ni o khi okpegbhe, ni eke ẹa lolo la. Igho e nyanya ze, e fu, ama oni eke ọa limhi. ⁶ Ama abi ovo o ro to, o tose we a, e khakha, itobo khi ẹa me eke ni o limhi pfi imhili lo. ⁷ Ikpamhi emhi elese e de kulo ifui igba. Igho igba e ze lasele tono eni iakpa abi e ro fu vule. Itobo igho, ẹa ke dobe ni e fu nyanọ ekhe lasele. ⁸ Ama ikpamhi eghuo, e de shi eke onete. Eni ikpamhemhi e ze, e fu, e nyanọ ekhe lasele. Eghuo ọ, e mhue ikpamhi uye ali igbe, eghuo ọ, e mhue ikpamhi egbhueshe, elese e mhue egbhueshe.”

⁹ Igho iJesu, ọọ, “Oni ọ mhọli eso, ọ suọ.”

*Emini o ze ni a ro ze oni okhe irokhokho
 (iMat 13.10-17; iLuk 8.9-10)*

¹⁰ Abi iJesu lolighuo ọ ro shito, eniye odukhokho ogbava eyoli ali egboese ni e li suọ abi ọ ro ngme, e bhale deba li, ọ gueye we emini ọ ri oni okhe irokhokho ngme. ¹¹ Ọọ we, “A she ri osheli oyi Eghiele oyi Eshinegba na ẹ. Ama okhe irokhokho a ro gue ungmehi nya ye egboese. ¹² Ni a bhale ya ẹ khi,

“ E kha riẹ nya alo-a shi eke
 ẹa tigbe ya me emhikhoghuo,
 ali e kha riẹ ku eso a shi eke,
 ọa ya lo we eso.
 Irari khi ini ọa khi igho,
 e dobe me eke, e suọ eso,
 e mu pfi deba Eshinegba,

ọ rọ topfa wẹ.’ ”†

*Ijesu ọ guele emini oni okhẹ irọkhọkhọ o ngme
(iMat 13.18-23; iLuk 8.11-15)*

¹³ Ijesu ọ mhila wẹ, ọọ wẹ, “Aa lẹsẹ emini a ri okhẹ irọkhọkhọ ona ngme? Sẹ a li tigbe ya lẹsẹ emini a ri okhẹ irọkhọkhọ okhọghuo ngme shọ? ¹⁴ Eni iakpa ni ọni ọghiale ọ miatsẹ ẹ ku, e migha shi ungmehi oyi Ẹshinẹgba. ¹⁵ Eri ikpamhi iakpa ni e de shi ode e li abi ẹgbọ eghuo ni e kha da lẹsẹ suọ oni ungmehi ne, Ọkphaghie ọ bhale ya rue wẹ luẹ udu le. ¹⁶ Ikpamhi emhi ni e de shi eke ni o li echeche, e li abi ẹgbọ ni e kha da lẹsẹ suọ oni ungmehi ne, e ri udu oghẹle mie ọli. ¹⁷ Ama, ọa ya tiemhi wẹ eke elemhi. Ẹa doḅe migha tẹsẹ, itobọ khi ọa pfi imhili lo eke. Itobọ ighọ, ini ọmunu o bhale ali ni a rọ mu okhọli vule shi wẹ ọ rọte oni ungmehi ni e suọ, e keḅe de ode-a. ¹⁸ Ikpamhi emhi ni e de pfilo ifui igba eri e li abi ẹgbọ ni e kha suọ oni ungmehi, ¹⁹ isamhi ingme agbọ ona, ali ọghuẹmhe ẹpfue, ali ọghuẹmhe khi ọghuẹmhe e lu guese oni ungmehi-a, ẹẹ tonon ọli igba, itobọ ighọ ọa mọ imọmhi. ²⁰ Ama ikpamhi emhi ni e de shi eke onete, e li abi ẹgbọ ni e suọ ungmehi, e mie ọli suọ, e mọ imọmhi enete. Eghuo e mhue ikpamhi uye ali igbe, eghuo e mhue egbhuesẹ. Eghuo, e mhue egbhueshe.”

*Ákpá ni a rọ nga ukhomhi asha
(iLuk 8.16-18)*

²¹ Ijesu ọ gbolo ẹ wẹ “Ọgbọkhọghuo ọọ ya ri ákpá ru lasẹle, ọ ya rue atalabi guese ọli mu eke,

† 4:12 Li zẹ Aza 6.9,10

wẹkhi eri ọ ke ya rue ọli ya sheli ufui ukpho?‡

²² Emiemini a rọ sheli, o ya lasese gbo alo gbugbugbu. Aa me emhi osheli ni aa ya khueghie a. §

²³ Onini ọ mhọli esọ, ọ ri esọ shi eke ni ọ suọ.”

²⁴ O gbolo ẹ we, “Emiemini u da suọ kpa, sa ọ bie! Emiemini u da rọ shi ushi rọ gue ẹgbọese ẹzọ, Ẹshinegba ọ li ya rọli gue ẹ ẹzọ. Oye o gbo ya ze ne.

²⁵ Oni ọ kpẹ mhọli ne, a ya gbo rọ ma ọ na li, ama oni ọa mhọli a ya mie ọli ukukuọ ni ọ gbo mhọli.”*

Okhe irokhokho oyi ikpamhi emhi ni ọọ zẹ

²⁶ Ijesu ọ gbolo ẹ, “Abi Eghiele oyi Ẹshinegba o li na. Eri o li abi ini omose ọ miatse ikpamhi iakpa kia ku shi eke. ²⁷ Obili o kha bi, ọ ya lese a, ogbe o kha gbe ọ guale, ama eni ikpamhi emhi ẹẹ zẹ lasese, ẹẹ fu vule. Ama ọa ya lese abi o li kia. ²⁸ Eke lolighuo ọ lese abi o li ri emhi ẹkomhi ẹẹ bie. Oni odode, o kha zẹ ukhuli, o ke fu vule, o nyanọ ifele, o ya ri umomhi lasese. ²⁹ Eni iakpa e kha da bie ne, oni ọ gua we ọ rue agaga ya gbe we, itobọ khi ẹghẹghẹ ikhiese o ramhi.”†

Okhe irokhokho oyi ukpamhi ọọra imositadi

(iMat 13.31-32,34; iLuk 13.18-19)

³⁰ Ijesu ọ gbolo ẹ we, “Elo awa mema ri Eghiele oyi Ẹshinegba ya khokho? Okhe irokhokho onoghwo awa mema ya zẹ rọli lo ẹgbọ esọ egho o? ³¹ Eri o li abi ukpamhi ọara imositadi ni ukpamhi ọli o she ne nya agbo ona, ni ọgbọ ọ rọ kọ eke. ³² Ini a rọli kọ, o zẹ, o fu vule, o mele unyanọ ni o fune a

‡ 4:21 Li zẹ iMat 5.15; iLuk 11.33 § 4:22 Li zẹ iMat 10.26; iLuk 12.2 * 4:25 Li zẹ iMat 13.12; 25.29; iLuk 19.26 † 4:29 Li zẹ iJọe 3.13

shi ishemhi, ni o mhọli iguabọ eniemhi, ni ipfeli ẹ bhale ya ku eko shi.”

³³ Okhẹ irọkhọkhọ enana iJesu ọ rọ nu wẹ ngme oni ungmehi, ramhi ashini o lo wẹ esọ ramhi.

³⁴ Aa mẹ ungmehi ni ọ nu wẹ ngme, ni ọa ri okhẹ irọkhọkhọ nu wẹ ngme. Ama ini o de tẹ ọli ali eniyẹ odukhokho eyọli, ọ rọ ri emini ọ nu wẹ ngme nya a lo wẹ esọ.

*Ijesu ọ pfomhise akpekpeli
(iMat 8.23-27; iLuk 8.22-25)*

³⁵ Eẹ ogbomhi ẹlẹghọ, iJesu ọọ eniyẹ odukhokho eyọli, “Awa da je ukiẹkiẹ okẹ obini o kpọle.” ³⁶ Ighọ e zẹ ẹgbọ ni e legba obọ shi aghọ, eni eniyẹ odukhokho e ya lo elemhi ọkọ-okẹ oni ikeke ni iJesu ọ she lo shitọ. E gua li vu. Ọkọ-okẹ elese e li deba wẹ vu.

³⁷ Utoghukpe, akpekpeli oniemhi oo li, oo zughuse oni okẹ, ni amẹ e fiase kulo elemhi oni ọkọ-okẹ, ramhi ni o rọ vọ amẹ. Ukukuọ o kpọle ni ọa rọ kulue. ³⁸ Ijesu ọ la ukhokho oni ọkọ-okẹ oniemhi, ọ lese-a ri ukhomhi nga akpesukhomhi. Ighọ eniyẹ odukhokho eyọli e guise ọli le. E ọli, “Ọsẹsẹ, wa bie ga liẹ ini awa ghọ ghua?”

³⁹ Ighọ iJesu ọ ti vule, ọ dese oni akpekpeli, ọọ li, “Li tsuke.” Ighọ oni akpekpeli ó pfomhẹ te. Asha kpa o pfomhẹ tsuke.

⁴⁰ Ighọ iJesu ọọ eniyẹ odukhokho eyọli, “Elo o zẹ ni a rọ lighọ ọ na ulishi. Eri aa kie mhọli irudunga?”

⁴¹ Ulishi oo mu wẹ, e mhila egbe wẹ, “Ọghuo ọna ọ khi? Ghe akpekpeli ali izughuse okẹ e ga suọ esọ a na li.”

5

*Ijesu o ri omose ni ayemhe ebe o la egbe ze
(iMat 8.28-34; iLuk 8.26-39)*

¹ Ijesu ali eniye odukhokho eyoli e da oke iGalili je ukiēkiē eke iGerasenēsi. ² Abi ijesu o leṣe rōte elemhi oko-okē lasele, omose ni o mholi ayemhe ebe, o rōte atalimhi ni o la agho bhale deba ijesu. ³ Ifui atalimhi oni omose o o la. Ogbokhoghuo o a ke doḃe ri iweḃhe ge o li. ⁴ Eḃheḃhe kpa, a rō ri iweḃhe ge o li abo ali awe, ama eri o o kphuru we a, o taghiye we a, o shashe we a. Ogbokhoghuo o a doḃe mu o li. ⁵ Nobi-nogbe o rō la ifui atalimhi ali ikhomhi ite dudu gasē. O o pfi okokokhue. O ri eche fianō egbe o li.

⁶ Abi o leṣe ta pfia me ijesu te, o na bhale ya wugha li odalo. ⁷ O tseṣe leghe, o o, “Ijesu Omi Eshineḃba ni o Yagha Ne Nyaa, elo wa nono mhe egbe? Mhi ri Eshineḃba lema e khi na mhe osoli!” ⁸ Itobo emini o rō ngme na khi, ijesu o she kpe gueye o li, “Yeḃe ayemhe obe, lase oni omose ona egbe le.”

⁹ Igho ijesu o mhila li, “Se a lui eva oye?” O o, “Eva oyemhe o khi Olele eḃo, itobo khi anye bu gba.” ¹⁰ O gbo lema ijesu o kpekpe, o khi khu ewe oni eke ya lase.

¹¹ Igulu ni e bububu e la epfe ute ni o la agho le eminale. ¹² Eni ayemhe e lema ijesu, “Khu anye ya lo igulu egho, ze ni anye ya lo we egbe.” ¹³ Ijesu o ri eḃheḃhe na we, e ka lo eni igulu egbe. Igho e rōte oni omose egbe lasele e ya lo eni igulu egbe. Eni igulu ni e ramhi agbeḃe eva, e rōte egele na ya kulo oni oke, e ghuloa nya.

14 Eni e ri ukpẹlo e khu eni igulu e na je ifui apfẹ ali ẹoli nya ni e la oni eke ya guele emini a me. Igho ẹgbọ e bhale ya bino emini a me. 15 Abi eni ẹgbọ e ro bhale deba iJesu, e me oni omose ni ayemhe ebe ni e bu e kpe la egbe, khi o shito agho, o ri itsua so, ẹgbhali eyoli e she gba na li. Ulishi oo mu we. 16 Eni e me emini a me e gueye ẹgbọ emini oni omose ni ayemhe obe e la egbe o me egbe ali emini e li eni igulu. 17 Igho, e gueye iJesu o lase wewe eke le.

18 Abi iJesu o lo elemhi oko-okẹ oniemi khi oo ke vu, oni omose ni ayemhe ebe e kpe la egbe, o lema iJesu o ze ni loli deba li vu. 19 Ama iJesu o a lama na li. O ri ochoghọ liẹ oli, “Ke je apfẹ ni u ya gueye ẹgbọ ena unuekpe oye emini Onomhue o riele ne, ali abi o li le elemhi e.” 20 Igho oni omose o lui ifui ẹoli igbe ododa ena eke iDikapolisi. O kia gueye ẹgbọ abi iJesu o li riele na lue. O ri abo sha ẹgbọ nya.

*Omueshi ni o ghu-a ali okpotso ni oia ee ku egbe
(iMat 9.18-26; iLuk 8.40-56)*

21 Abi iJesu o ro gbo nyene egbe da je ukiẹkie oke obini o kpo, ẹgbọ e le gase oli. 22 Omose oghuo ni a lu iJarosi, ni o khi otuoghuo eni e mheshe shi owa ugami, o bhale akaghọ. Abi oo me iJesu te, o de ya wugha li odalo. 23 O mema lolo lema li, o o li, “Omimhe oni omueshi o ma ghua gba memena, kpekpe bhale ya ri oboto o li egbe ni o ze, ini o khi ghua.” 24 Igho iJesu o deba li vu.

Igho ebubu ẹgbọ e deba li e ve mu oli. 25 Okpotso oghuo o la agho ni o she ku oia ishito egbe ramhi ikpe igbeva. 26 O she me osoli oboto oyi ebubu ẹgbọ abi o ro kia dua oni ughuami. O she ri epfue eyoli nya dua o, ama o a pfo, oo ga kholo oli egbe. 27 Abi

o ro suo ingme oyi iJesu, igho o te ifuabo oyi egbo ri obo ti oli awulu ni o so. ²⁸ O ro li shi udu khi, “Ini mhi da me asha ri obo ti oli awulu ne, mhi ya ze.”

²⁹ Abi o ri obo ti oli awulu te, eni oia ni e ku oli egbe, e khakha utoghwo kpe. Aghoaghwo o lese khi emini o yeso lue e ngme, khi o pfo.

³⁰ Aghoaghwo, iJesu o lese khi itoto o she rote lue egbe ya lase. Igho o migha, o mu egbe pfi iteva egbo ni e sha mu o. O mhila we, odo. “Oghwo o ri obo ti mhe awulu?”

³¹ Eniye odukhokho eyoli ee oli, u ga me abi egbo e lie ve mu e, u kiele e mhila, “Oghwo o ri obo ti mhe?”

³² Ama, iJesu o kie bino gase ini o me oni o ri obo ti o. ³³ Abi oni okpotso o ro me abi o ke li oli egbe, o bhale odalo oyi iJesu ya wugha, ulishi o mema mu oli, o gue igesikia le abi o ga li kia nya. ³⁴ IJesu odo oni okpotso, “Omi mhe, irudunga oye o she mie e pfuese. Ri opfomhe ke je, anasemhe oye o she pfo.”

³⁵ Abi iJesu o kie li ngme, emose eghwo, e rote owa oyi iJarosi bhale. Ee iJarosi, “Omi e o she ghua, khi ke yeso Osese ngme.”

³⁶ IJesu o a fe ri eso shi emini e ngme, odo oni omose “Khi ze ni ulishi o mu e, ama lese mholi irudunga.”

³⁷ Oa ze ni ogbokhoghwo o deba li se ni iPita, ali iJemhisi ali iJoni inyoghwo iJemhisi. ³⁸ Abi e ro bhale owa oyi iJarosi, iJesu o me abi egbo e li i kpe okeke, ni e li i vie gbii. ³⁹ Igho, o lo elemhi oni owa, odo, “Elo o pfi onyaghu onana? Elo o re e vie? Oni omoo oa ghu, eri o lese a.”

⁴⁰ Ama eni ẹgbọ e gia li. Abi ọ rọ khu wẹ fiẹ se, ọ rue ita ali inyo ọni ọmueshi ali eniye odukhokho otuase egho mhuẹ obọ je ashini ọni ọmọ ọ yeshi.

⁴¹ Ijesu ọ mu ọli obọ, ọọ ọni ọmueshi, “Talita kumi.” Emini a ri ona ngme khi, “Ọnọmueshi, mhiẹ yẹ u vule.”

⁴² Utoghwo kpe, ọni ọmueshi ọ vule, ọ kia gase. [Ọmọ ikpe igbeva ọ khi.] Abi a rọ mẹ ona, o ri abọ sha wẹ. ⁴³ Ama ijesu ọ lolo tse agua yẹ wẹ e khi gueyẹ ọgbokhoghuo. Ọọ wẹ, “A ri emhi na li le.”

6

A ri ukpeloe gbe ijesu obini iNazareti (iMat 13.53-58; iLuk 4.16-30)

¹ Ijesu ọ rọte agho vu je ẹoli oyọli, eniye odukhokho eyọli e deba li. ² Ogbelẹ iyemheẹa oyi ẹgbọ iju o ramhi, ọọ sẹsẹ elemhi owa ugamhi. O ri abọ sha ebubu ẹgbọ eni e ri esọ shi ọli ọ.

E mhila egbe, “Obo ọni ọmose ọna ọ rọte mẹ eni emhi enana? Ilesingme nabi onoghwo na ni a rọ na li, ni ọ gbo rọ gbe ikanya ọnyaloo? ³ Ọna ọa she khi ikapita, omi iMeli, ni ọ gbo khi inyooghwo iJemhisi ali iJosisi ali iJudasi ali iSamọ? Ena ẹa khi inyooghwo ọli eni imueshi, ni e ga li nu awa la akana enana?” O ri elemhi bi wẹ.

⁴ Ama ijesu ọọ, “Ashakpa a la mu ekpe na ọmekẹguele, se ni apfe oyọli ali unuekpe oyọli aa la mu ekpe na li.”*

⁵ Ọa dobe la akaghọ gbe akanya ọnyaloo okhoghuo, se ni ikuku ẹgbọ ni ẹa ze ni ọ rọ ze

* **6:4** Li zẹ iJon 4.44

abi ọ rọ ri obọ ti wẹ. ⁶ Umha-mhọli irudunga oyewẹ o ri abọ sha iJesu.

Ighọ iJesu ọ kia rọte ẹoli je ẹoli sẹsẹ eni ẹgbọ.

*Ijesu ọ ghie eniye odukhokho otuogbava fiẹ
(iMat 10.5-15; iLuk 9.1-6)*

⁷ Ọ lu eniye odukhokho etuogbava eyọli tigbili, ọ ghie wẹ ava-ava fiẹ, ọ ri ekpabọ na wẹ ni e rọ mhue itoto rọ khu ayemhẹ ebe.

⁸ Ọ gueye wẹ, “Ini a lẹ, a lẹsẹ rue orọkpọ mhue obọ, a khi tsua eminale, wẹkhi akpaba ni a pfi ẹ sọ, wẹkhi ukpaghọ. ⁹ A sọ ekuẹ, ama a khi tsua awulu olese ma oni a rọ sọ. ¹⁰ Ọ gbolo ẹ wẹ, a kha da lo apfẹ okhọghuo le ni e rọ da mie ẹ, a la akaghọ ramhi ni a rọ ya rọte oni ẹoli vu. ¹¹ Ini o khia khi a bhale ẹoli okhọghuo khi eni ẹgbọ ẹa mie ẹ, ni ẹa rọ gbo ri esọ shi emini a ngme, a rọte aghọ vu. A kpe abọ ọ-a na wẹ, a rọte aghọ vu. Eri ona o ya khi ọtsẹlẹ shi wẹ egbe.”†‡

¹² Ighọ e fiẹ ya tse abọ gasẹ, e liẹ ẹgbọ e rọte olamhẹ oyewẹ mu pfi. ¹³ E khu ebubu ẹgbọ ayemhẹ ebe egbe-a, e ri oili to eni ẹẹ ghua ebubu egbe, e rẹwẹ ze.§

*Eghuli oyi iJoni Oni ọọ batazi
(iMat 14.1-12; iLuk 9.7-9)*

¹⁴ Eghẹghẹ ana, oghie Erọdu ọ li suọ eko eni ingme ena nya, itobọ khi eva oyi iJesu o she gasẹ asha kpa. Ẹgbọ eghuo e liẹ khi iJoni Oni ọọ batazi lọ ni ọ nyenẹ egbe bhale agbọ, lọli o zẹ ni ọ rọ lighọ mhọli ekpabọ rọ gbe ikanya ọnyalao.

† 6:11 Li zẹ Ika 13.51 ‡ 6:11 Li zẹ iLuk 10.4-11 § 6:13 Li zẹ iJem 5.14

15 Egbọ eghuo e liẹ khi, “Elaja Ọmekeguele ọ khi.” Elese ẹ khi, “Ọmekeguele nabi emekeguele ena ẹlẹlẹ ọ khi.”*

16 Ama abi Eṛodu ọ rọ suọ ona, ọ kẹ, “Iṛoni, ni mhi khi ukhomhi ọ, a rọte eghuli guise le!”

17 Itobọ khi Eṛodu ọọ ke mhẹsẹ a mu iṛoni gẹ pfilo owa ighumha. Ini egbe e ba mu Eṛodiasi. Eri Eṛodu ọ mie iFilipu inyoghuo ọli Eṛodiasi. 18 Eghẹghe kpa Iṛoni ọ rọ gueye Eṛodu khi, ọa ti ni ọ rue ughue inyoghuo ọli shi.†

19 Itobọ ona, ọni Eṛodiasi ọọ biselemhi iṛoni, ọọ nono ode ni ọ te ya gbe ọli-a, ama ọa dobe. 20 A gbo bhale ya ẹ khi Eṛodu ọọ na ulishi iṛoni itobọ khi ọ leşẹ khi iṛoni khi ọgbọ onete ali ọgbọ ọ ni ọ pfuase ọ khi. Ọ ri irarighọ ri ukpeloe ẹ khu ọli. Ọ ma nono ni lọli ri esọ ke shi ungmehi oyi iṛoni, ini o ri riẹ khia khi ingmemhi eyọli e ma yese ọli udu-a eghẹghe kpa ni ọ rọ suọ li.

21 Ikpukhokho ọ, Eṛodiasi ọ mẹ ashini ni ọ te ya mu ota sọ iṛoni. Ighọ ẹlẹghuo ni o ikhi ogbele ni Eṛodu ọ rọ mhọli ukue ni ọ rọ yelele ogbele ni a rọ bia li le. Ọ ya luno idenomọ eyọli ali ẹgbọ eni mu ẹloe ali ẹgbọ igomẹti ali eni ẹẹ gbe ikanya igomẹti ni e la eke iJudia shi oni ukue. 22 Abi omọ omueshi omi Eṛodiasi ọ rọ fiẹ lasese gbe ishimhi, o mema ti Eṛodu ali ẹgbọ eni e bhale ya bino ọli ẹloe.

Ighọ ọni oghie ọọ ọni omueshi, “Mhila mhe emiemini o ga ghọle ẹ, mhi ya rọli ne.” 23 Ọ romhi isheli khase ọni omueshi, “Emiemini u mhila, mhi

* **6:15** Li zẹ iMat 16.14; iMak 8.28; iLuk 9.19 † **6:18** Li zẹ iLuk 3.19-20

ya rōli ne, o kha rię khi agbekhi-eva eghiele oyemhę.”

²⁴ Igho ọni ọmueshi ọ fię ya mhila inyo li, “Elo mhi ya mhila?”

Inyoli ọọ li, “Ukhomhi oyi iJoni Ọni ọọ batazi ẹgbọ wa mhila.”

²⁵ Aghoaghọ ọni ọmueshi ọ nyanya na ya lo deba oghie, ọ mhila li, “Ukhomhi oyi iJoni Ọni ọọ batazi ẹgbọ mhia nono ni u khi shi ukpeko na mhe memena.”

²⁶ Udu o tode yese oghie a. Ama itobo ekha ni ọ tse ukpeloe oyi epfese ni ọ lu shi oni ukue, ọa ke dobe ti da oni ekha. ²⁷ Aghoaghọ ọ ghie eni ẹę gbolo ẹgbọ-a e ka pfa iJoni ukhomhi ọ bhale. Eni emose e je owa ighumha ya khi iJoni ukhomhi ọ. ²⁸ E rue ọli shi ukpeko bhe. Igho oghie ọ kpha li na ọni ọmueshi. Ọni ọmueshi ọ kpha li na inyo li. ²⁹ Abi eniye odukhokho eyi iJoni e ro suọ ona, e bhale ya tsua etuli oyoli ya ro to.

*Ijesu ọ ri eminale na ẹgbọ agbele ishe le
(iMat 14.13-21; iLuk 9.10-17; iJon 6.1-14)*

³⁰ Eni ighiusomhi na keę e jele, e le gase ọli, e gueye ọli emini e rięle ali emini e seşe nya. ³¹ Igho, itobo ebubu ẹgbọ, ni ee bhale ni ee vu, ijesu ali eniye odukhokho eyoli ẹa me asha le eminale. Ijesu ọọ we, “A bhale ni awa je ashini awa-eghuo tse awa ya la, ni a yemhe-a ukuku ọ.”

³² Igho weweghuo tse ee lo oko-okę oniemi ya je ashini o da-ya. ³³ Ama ebubu ẹgbọ ni e me we abi e ro vu, e lese khi wewe lo. Igho eni ẹgbọ e rote ẹoli nya ri awe na ya ralo ashini ijesu ali eniye odukhokho eyoli e je. ³⁴ Abi ijesu ọ ro ramhi agho,

o me abi eni egbo e bu, elemhi we e lala li. Itobo khi eri e li abi isumha ni ea mholi oni o re we e kia. Igho o li sese we emhi ebubu.‡

³⁵ Eghēghe ana, ogbe o she vu. Igho eniye odukhokho eyi iJesu e bhale deba li, e ke oli, “Aborokhia khi oola ó nuata shi apfe ena, ni eghēghe o ro she vu dose ena, ³⁶ waa ke gueye eni egbo ena e kia je ifui apfe ya nono emhi de le.”

³⁷ Ama, iJesu o o we, “A ri emhi na we le.”

E mhila li, “Ifata eyi ogbele elele eyi ogbo e ya lo ni a ro de ibuledi ghi we le?”

³⁸ Igho iJesu o mhila we, “Iruli ibuledi ingme a mholi shi agho? A ka bino ghue.”

Abi e ro bino se, e oli, “Iruli we ishe ali ifele aava.”

³⁹ Igho iJesu o o we e riele eni egbo shito ikui-iku, ukhomhi ebuli. ⁴⁰ E shito ikui-iku, egbo egbhueshi-she ali egbhue-eveva ali ogbogbe. ⁴¹ Igho iJesu o o rue eni ibuledi ishe ali ifele aava egho, o bino idane, o tse Eshinegba uwegbe. O gbe eni ibuledi khia, o ro na eniye odukhokho eyoli e ke kemhi na egbo. O gbo kemhi eni ifele aava na we nya. ⁴² Ogbokpa o le, o khue. ⁴³ Iku we ni eniye odukhokho eyoli e san o eke, e vo ighughu igbeva.

⁴⁴ Emose agbele ishe, e le eni eminale.

*Ijesu o kia ukhomhi oke
(iMat 14.22-23; iJon 6.15-21)*

⁴⁵ Aghoagho o ri omo odukhokho eyoli lo oko oke oni emhi, e ka ralo iBetisaida ya migha khe lue uki kie obinokpole. Igho o gueye oni ukpokpomhi

‡ 6:34 Li ze iNoba 27.17; 1 Ighie 22.17; 2 Okhe 18.16; Ezik 34.5; iMat 9.36

ebubu ẹgbọ e ke je apfe. ⁴⁶ Abi ọ rọ tse wẹ okhila se nya, ọ nga ukhomhi ute ya sọ iromhi.

⁴⁷ Ogbomhi ò mu eke, oni ọko-oke oniemi o kia ramhi iteva oni oke, o ke kpe iJesu lɔlighuo tse le shi eke. ⁴⁸ Ọ me khi akpekpeli óo nase eniye odukhokho eyoli. O ramhi itsotso ogbie, iteteva elemhi agogo ese ali agogo esesa, ọọ kia ukhomhi oni oke le deba we. Ọ she kia ya dose we. ⁴⁹ Ama abi e me iJesu khi ọọ kia ukhomhi ame, e dabi khi ayemhe olimhi lo, e tseşe leghe. ⁵⁰ Itobo khi eri wewe nya e yila abi e rọ me oli.

Aghoaghọ ọ nu we ngme, ọọ we, “A mholi udu! Mhemhe lo! A khi ke na ulishi.” ⁵¹ Ọ lo elemhi ọko-oke oniemi deba we, oni akpekpeli o pfohmhe. O ri abo sha eni eniye odukhokho, ⁵² itobo khi ẹa kie dobe lese udi ingme eminale ni ọ kpe rọ na ẹgbọ agbele ishe le; a toto we udu.

IJesu ọ la iGenesareti ri ẹgbọ ze (iMat 14.34-36)

⁵³ Abi e rọ da oni oke se, e lasele shi iGenesareti, e mu oni ọko-oke oniemi zu agho. ⁵⁴ Abi e lese rọte ọko-oke oniemi tiemie, ẹgbọ e she lese khi iJesu lo. ⁵⁵ Igho eni ẹgbọ e nyanya kia gase oni eke nya, ashiasini e da suọ khi ọ da la ne, e tsua eni ẹẹ ghua shi iya bhale agho. ⁵⁶ Obiobini iJesu ọ da je ne, o ke khi ẹoli ni e gbedi, o ke khi enikeke o, ghe ifui ishemhi o, eri ee tsua eni ẹẹ ghua bhale agbagbajighana atuoki. E lema iJesu ọ lese ze ni eni ẹẹ ghua e ri obọ ti ọ esọ awulu ni ọ rọ sọ tse. Eni e da ri obọ ti oli nya e ze.

7

*Osẹsẹ oyi ipfuasẹ ni o te ekelemhi lasele
(iMat 15.1-9)*

¹ IFarisi ali esẹsẹ Ishi eyi iMosisi eghuo ni e rọte iJerusalemu bhale, e le gasẹ iJesu. ² E mẹ khi eniyẹ odukhokho eyọli eghuo e ri abọ ni ẹa pfuasẹ ni aa kpe-a a le eminale. [Emini a ri ona ngme khi ẹa kpe abọ-a abi ẹgbọ iFarisi ẹẹ a ke li.]

³ Irari khi iFarisi ali ẹgbọ iJu eni e kpọle nya ẹa ya le eminale ini ẹa li kpe abọ-a. Abi ititawẹ e sẹsẹ wẹ na, ni e rọ gbe akanya. ⁴ Ini e rọte oki jele khi ẹa li kpe egbe a, ẹa ya le eminale. E gbo mhọli ighuighuẹ ebubu elese ni e gbolo ẹ ghuẹ, Ighuighuẹ abi a liẹ kpe iko, ekhe, itasa ali igege-a.

⁵ Irarighọ, eni iFarisi ali esẹsẹ Ishi eyi iMosisi e mhila iJesu, “Elo o zẹ khi eniyẹ odukhokho eyẹ ẹa ri ishi ni itita awa e rọ shi eke gbe akanya, ni e rọ ri abọ eni ẹa pfuasẹ ẹ le eminale?”

⁶ IJesu ọọ wẹ, “Igesikia Azaya ọ ngme abi ọ rọ ngme ungmehi oyi Eshinegba ni o gọ lu ẹẹ ni a di egbe ẹ. Oni a keke shi eke khi,

“Ungmemhi unu
ẹgbọ ena e rọ ri ekpe ẹ na mhe,
ama udu oyewẹ
o nuata shi mhe ọ.

⁷ Ugamhi afue ẹẹ ga mhe,
ushi eni ẹgbọ e rọ shi eke,
ẹẹ sẹsẹ ẹgbọ.*

⁸ A she pfi ishi eyi Eshinegba shi eke, a ri osẹsẹ eyi ẹgbọ ẹ gbe akanya.” ⁹ O gbolo ẹ wẹ, “A ga lẹsẹ ode ni a te ri ishi eyi Eshinegba shi ukhokho obọ, ini a

* 7:7 Li zẹ Aza 29.13

ba me asha ri oseşe eye ẹ gbe akanya. ¹⁰ Itobo khi iMosisi oṣo lie, ‘Mu ekpe na ite ali inye.’ O gbolo ẹ, ‘Onini o da ku itse ni itali okekhi inyoli ne, a gbe oḷia.’† ¹¹⁻¹² Ama ẹẹ a seşe ẹgbọ khi ini oṣbo o gueye itali okekhi inyoli, khi emini loli kha kpe ro kpaghie itali ali inyoli obo khi Ikobani o ke khi, khi oṣa mhue abi o ngme. Khi ushi oṣa mu oḷi ini oṣa ke ririe ri emhikhoghwo na itali ali inyo li. (Emini a ro somhi Eshinegba opfa se, áá lui Ikobani). ¹³ Eri a ri oseşe ona a shishi ungmehi oyi Eshinegba eke a. A gbo mholi emhi elese eghoghọ ebubu ni a gbolo ẹ riẹle.”

Emini e ri oṣbo khi oni oṣa pfuase
(iMat 15.10-20)

¹⁴ Ijesu o gbo lu eni ebubu ẹgbọ gbili, oṣo we, “A ku esọ a shi mhe o, ni ona o lo ẹ esọ. ¹⁵ Emhikhoghwo oṣa la o ni oṣbo le, ni o ri oṣbo khi oṣa umha pfuase. Se ni emini o roṣe oṣbo ekelemhi lasele, o ri oṣbo o khi oni oṣa pfuase odalo oyi Eshinegba.” ¹⁶ [Oni o mholi esọ, o ro suo.]

¹⁷ Abi ijesu o ro pfi eni ebubu ẹgbọ shi agho ni o ro ya lo owa se, eniye odukhokho eyoli e bhale deba li, e mhila li emini oni ungmehi o ngme. ¹⁸ O mhila we, “Aa kie leşe udi emini mhia ngme? Oṣa kie lo ẹ esọ khi emhikhoghwo ni o roṣe odato lo oṣbo elemhi khi oṣa ya ri oḷi khi oni oṣa pfuase odalo oyi Eshinegba? ¹⁹ Irari khi oni emhi oṣa ya je oḷi udu, ama eke elemhi oṣo tiemhi, o gbo roṣe idiegbe ya fie lase.” Eri ijesu o ri ona guele khi eminale ni a le nya, khi e ti.

† **7:10** Li ze Okiali 20.12; iDeut 5.16; Okiali 21.17; iLev 20.9

²⁰ Ijesu ọ gbo liẹ. “Emini o rọte ọgbọ ekelemhi udu lasele, o ri ọgbọ ọ khi ọna umha-pfuase. ²¹ Itobọ khi rọte ekelemhi udu oyi ọgbọ, isamhi ebe e rọte ẹ lasele, enabi, itşẹbọ, ighiatọ, ọgbọ ugbeli, okia, ²² emhi ituegbe, ọbe imumu, ikpamhika, efi-ala, ubọgbọ, iyese-egbe eva a, umha-mhọli ekpe, iditşea. ²³ Ekelemhi udu eni ingeli ena nya e rọte ẹ lasele ni e ri ọgbọ ọ khi ọna umha-pfuase odalo oyi Ẹshinẹgba.”

*Imiesuọ oyi ọkpotoso ọghuo
(iMat 15.21-28)*

²⁴ Ighọ ijesu ọ rọte aghọ vu, ọ je ukiẹkiẹ ekẹ iTai. Ọ lo owa ọghuo, ọa nono ni ọgbọkhọghuo ọ lẹşẹ khi lọli la akaghọ. Ama ọa dobe ri egbe ọli sheli.

²⁵ Abi ọkpotoso ọghuo ni ayemhẹ ebe o la omi ọli oni ọmueshi egbe, ọ rọ suọ eko ijesu, ọ nyanya bhale ya de wugha li odalo. ²⁶ Ọngi iJeta oni ọkpotoso ọ khi, a bia li shi ekẹ iFonisha ni o la iSiria. Ọ lema ijesu ọ khu oni ayemhẹ ebe omi ọli egbe a.

²⁷ Ijesu ọọ li, “Zẹ ni eniyẹ e kpẹ le eminale ne, ọa ti ni eminale ni a kha rọ na eniyẹ le, ni a pfi ọli ghi ewa.”

²⁸ Ọni ọkpotoso ọọ, “Guẹguẹguẹ Ọnọmhuẹ! Ama ewa e kiele la ifui itebu ẹ sanọ eminale ni eniyẹ kẹşẹ le le.”

²⁹ Ijesu ọọ ọli, “Itobọ oni ungmehi ni u rọ sọ mhẹ ọ ena, ke je, u ya bhale ya ẹ khi oni ayemhẹ ebe, o she rọte omi ẹ egbe ya lase.”

³⁰ Ighọ, ọli je apfe, ọ ya ẹ khi omi ọli o yeshi ukpho khi oni ayemhẹ ebe o she rọte ọli egbe vu.

Ijesu ọ ri ungmehi ni ọ gbo lesọ ze

³¹ Igho iJesu o roṭe ukiēkie obini iTai vu, o roṭe iSidoni ya tiemhi okē iGalili, o je eke iDikapolisi
³² Oobọ ẹgbọ eghuo e la tsua ọmọse oghuo ni o khi ọleso, ni o gbo khi unghu, bhale ghi iJesu. E lema li o kpekpẹ o leṣe ri obọ nga li egbe.

³³ Igho iJesu o rue lẹlighuo fiẹ iteva oyi eni ebubu ẹgbọ, o ri imiesabọ shi oni ọmọse esọ, o to ete, o ri obọ ti oni ọmọse ẹlẹmhi. ³⁴ Igho iJesu o bino idane, o tu ekperumhe-a, ọọ oni ọmọse “Efata!” Emini a ri ona ngme khi, “Khueghie-a!” ³⁵ Utoghuo kpe esọ eyi oni ọmọse e khueghie a, ẹlẹmhi oyọli o taghie-a, o ngme lasele gboo.

³⁶ Igho iJesu o tse agua ye we e khi gueye ọgbokhoghuo. Ama abi o doṭe tse agua ye we kpa, igho e doṭe ngme oni ingme. ³⁷ O ri abọ sha ẹgbọ eni e suọ nya. E liẹ, “O ma guẹ riẹlẹ emhikpa,” e gbo liẹ, “O ri eni e le esọ o suọ esọ, o khueghie ingmenu unu a, ẹẹ ngme.”

8

Ijesu o ri eminale na ẹgbọ agbeṣe asha ene le (iMat 15.32-39)

¹ Oa roṭe agho teṣe ni ebubu ẹgbọ elese e ro legba. Abi eni ẹgbọ ẹa ro me emhi le, ijesu o lu eniye odukhokho eyọli, ọọ we, ² “Elemhi ẹgbọ ena ẹẹ ala mhe, o she gba ẹlẹ esẹ ni e te nu mhe la ana ni ẹa te me emhikhoghuo le. ³ Ini mhiẹ e ri okiamhi ke je apfe mena, ubi o ya rue we shi ode, itobọ khi eghuo o, e roṭe odonuẹ bhale.”

⁴ Eniye odukhokho eyọli e mhila li, “Obo u sa khi a te ya me eminale ni e bu ifu odagbe ona, ni e ya khuese ẹgbọ ena nya?”

⁵ Ijesu o mhila we, “Ibuledi ingme a mholi?”
E oli “Ishilua.”

⁶ O gueye eni ebubu egbo e shito eke. Igho o rue eni ibuledi ishilua egho, o kphemhi na Eshinegba, o khi we-a, o rue we na eniye odukhokho eyoli e ke kemhi we na eni egbo. Igho eniye odukhokho eyoli e li kemhi na we. ⁷ E gbo mholi ikuku imi ifele shi agho. O gbo kphemhi na Eshinegba shi o. O rewe na eniye odukhokho eyoli e gbo li kemhi we. ⁸ Eni egbo e le, e khue. E le se, eni eniye odukhokho e san o iku we ni e le kpole vo ighughu ishilua. ⁹ Egbo agbele asha ene e khi. Ijesu oo eni egbo e ke je. ¹⁰ Loli ali eniye odukhokho eyoli e lo oko-ok e oniemhi e je ukiekie obini iDalamanuta.

Egbo iFarisi e mhila irokhase
(iMat 12.38-42; 16.1-4)

¹¹ Egbo iFarisi e bhale, e mhila ijesu ogbo ni e ro mu oli fe. Ee oli o ri irokhase ni o rote iloghie bhale khase ewe ni wewe e lese khi Eshinegba o ghie oli.*

¹² Ijesu o tu ekperumhe-a, oo, “Elo o ze ni ee egbo a ro mhila irokhase onyaloa? Abi o li mhi li gue oli e ye e khi, aa ya me irokhase onyaloa okhoghuo.”† ¹³ Igho o pfi we shi agho vu, o nyene egbe ukhokho gbo ya lo oko-ok e oniemhi, o da je ukiekie obinuzeva.

Oyese oyi iFarisi ali Erodu ni o li abi ifuma
(iMat 16.5-12)

¹⁴ Eniye odukhokho eyoli ea sato tsua ibuledi ni e bu, se ni uruli oghuo ni e mhue shi oni oko-ok e oniemhi. ¹⁵ Ijesu o tse agua ye we, oo we, “A mhue egbhe shi ifuma eyi iFarisi ali Erodu.”‡

* **8:11** Li ze iMat 12.38; iLuk 11.16 † **8:12** Li ze iMat 12.39; iLuk 11.29 ‡ **8:15** Li ze iLuk 12.1

16 Eniye odukhokho eyoli e nu egbewe ngme, e lie, “Itobo khi awa a mhue ibuledi o ro ngme ona.”

17 Ijesu o lese emini e ngme. O mhila we, “Elo o ze ni a ro gue ezọ khi aa mhọli ibuledi? Eri aa ya me eke abi khi eri ọa kie lo e esọ? Eri udu oye o na khukhu? 18 A mhọli alo, aa rewe a me eke? A gbo mhue esọ aa rewe e suọ? Aa sato?§ 19 Abi mhi ro kholo ibuledi ishe-a na egbo agbele asha ishe, ighughu ingme a sanọ iku we eke vo?” Ee oli, “Igbewa!” 20 “Abi mhi ro gbo kemhi ibuledi ishilua na egbo agbele asha ene, ighughu ingme a sanọ iku we vo?”

E oli “Ishilua.”

21 Oo, “Eri emini mhia ngme ọa kie lo e esọ?”

Ijesu o la obini iBetisaida khueghie ozalo alo a

22 E bhale iBetisaida. Egbo eghuo e tsua omose ozalo bhale ghi ijesu, E oli o kpekpe o ri obọ ti oli.

23 Igho ijesu o mu oni omose ozalo obọ-obọ ya fie ifui oni apfe. O to ete shi obọ ro shishi oli alo-a. Ijesu o mhila li ini o me emhikhoghuo.

24 Oni omose o bino idane, oo “Mhia me egbo khi e li abi eera a kia gasẹ.” 25 Igho ijesu o gbo ri abọ shi oni omose alo. Alo eyoli e tigbe khueghie-a, o me eke gboo. 26 Ijesu oo ke je, o oli, “Khi gbo je elemhi ifui eoli.”

IPita o guele oni ijesu o khi

(iMat 16.13-20; iLuk 9.18-21)

27 Igho ijesu ali eniye odukhokho eyoli e vu je ikuku eoli ni e la gasẹ iSizeria iFilipi. Abi e li le, o mhila we, “Oghuo egbo e famhi e lie khi mhi khi?”

§ 8:18 Li ze ijere 5.21; Ezik 12.2; iMak 4.12

28 E ọli, “Eri eghuo e khi iJoni ni oọ batazi egbọ u khi; eghuo e khi Elaja u khi; elese e khi oṣuoghuo emekeguele na eḷe u khi.”*

29 O ke mhila wẹ, “Ama, oghuo e e oyee a lie khi mhi khi?”†

iPita o so li o, oọ li, “Ye ye u khi iKirisiti ni o khi Omiepfuese?”

30 Ijesu o tse agua ye wẹ e khi gueye ogbokhoghuo oni loḷi khi.

*Ijesu o guele shi eke khi loḷi ya ghua
(iMat 16.21-28; iLuk 9.22-27)*

31 Igho o sese eniye odukhokho eyoli khi Omi Ogbọ o mema ya me osoli egbegbo. Eni egbhali, ali ighie eyi ekpodalo-ugamhi ali eni e sese ishi, e ya kie oli. A ya gbe loḷi-a, ama eḷe onuzi-ese, o gbo ya guale. 32 O ngme ona lasеле gboo. Igho iPita o lu oli ochi, oọ li o khi ke ngme ungmehi onana ghue.

33 Ama abi ijesu o ro nyene alo ukhokho bino eniye odukhokho eyoli, o dese iPita. Oọ li, “Vu mhe odalo le ye ye Okphaghie. Wa mholi ingme Eshinegba shi udu, ama emhi agbo.”

34 Igho o lu eni ebubu egbọ ali eniye odukhokho eyoli, oọ wẹ, “Ini ogbokhoghuo oọ nono ni loḷi bhale deba mhe, o mema ya kie egboli, o rue apfida oyoli, oọ deba mhe.‡ 35 Itobo khi onini o da dua ni loḷi tsumhi agbo oyoli ne, o ya de oli obo a, ama oni o da ri irari oyemhe ali irari oyi usomhi onete oyi Eshinegba rue agbo oyoli pfia, o ya tsumhi oli.§ 36 Eleli onoghuo ogbo o ya me ini o mholi

* 8:28 Li ze iMak 6.14-15; iLuk 9.7-8 † 8:29 Li ze iJon 6.68-69

‡ 8:34 Li ze iMat 10.38; iLuk 14.27 § 8:35 Li ze iMat 10.39; iLuk 17.33; iJon 12.25

agbọ nya khi ayemhe oyoli o li opfu-a? ³⁷ Elo ogbo o ya ro ooghie ayemhe oyoli? ³⁸ Ini omama oyemhe ali omama oyi ingme oyemhe o da mu ogbokhoghuo elemhi agbo ichimhi ali agbo okholo ona ne, omama oyi onogbo o ya li mu Omi Ogbo elegho ini o bhale elemhi ufumhi oyi Itali ali oyi igeni ni e pfuase.”

9

¹ O gbolo e we, “Mhi gue igesikia ye e khi, egbo eghuo e migha ana, ni ea ya ghu ne, ni e ro me khi Eghiele oyi Eshinẹgba o bhale, elemhi ekpabo.”

Imamachi oyi iJesu

(iMat 17.1-13; iLuk 9.28-36)

² Abi ele-esesa e ro dose, iJesu o rue iPita, ali iJemhisi ali iJoni, ya nga ute oniemi ni o yagha, asha ni weweghuo kpe e la. Igho e me khi iJesu o mu melaa. ³ Itsua ni o ro so, e pfuase-a, e ge pepere. E tode pfuase dose utsakolo, e dose abi ogbokhoghuo o a tigbe dobe ya li pfula we-a pfuase ramhi agbo ona. ⁴ Igho eni eniye odukhokho aase eyoli e me khi Elaja ali iMosisi e lasela nu iJesu gheta.

⁵ IPita o o iJesu, “Osese, o gue ti khi awa la akana. Zobe ni anye to ikholo ese shi ana. Oghuo o o kha khi oye, oghuo o khi oyi iMosisi, onokpole o khi oyi Elaja.” ⁶ Oa ke lese emini o ke ya ngme, itobo khi eri loli ali enekpole e yila dose.

⁷ Igho otughunu o lasela ya guese we-a, Eshinẹgba o rote elemhi oni otughunu ngme, o o,

“Omimhẹ ni Ọmọse na, ni mhi nono ingme oyọli egbegbọ. A ke suọ esọ na li.”*†

⁸ Utoghuokpe khi e ke pfi alo bino, ẹa ke mẹ ọgbọkhọghuo sẹ ni iJesu lọlighuo.

⁹ Abi e li rọte oni ukhomhi ute e tiemhi le, iJesu ọ gueyẹ wẹ e khi gueyẹ ọgbọkhọghuo emini e mẹ ini Omi Ọgbọ ọa li rọte eghuli guale. ¹⁰ E ri oni ungmehi gbe akanya, ama e nu egbewẹ ghẹta emini iroṣte eghuli guale o ngme.

¹¹ Ighọ e mhila iJesu, “Elọ o zẹ ni eni ẹ sẹsẹ e rọ liẹ khi Elaja ọ kpẹ ya bhale?”‡

¹² IJesu ọọ, “Egbegbọ lọ khi Elaja ọ kpẹ ya bhale, ọ ya bhale ya mu egbe emhi nya shi eke. Elọ o mema zẹ ni Ebe-no-pfuasẹ o rọọ khi Omi Ọgbọ ọ mema mẹ osue egbegbọ, a gbo kie ọli?” ¹³ Ama a ghe i, Elaja ọ she bhale, e riẹlẹ emini o ghọle wẹ deba li ẹzẹzẹ abi a li kẹkẹ ingme oyọli shi Ebe-no-pfuasẹ.

*Iroze oyi ozeo nọ mhue ayemhẹ obe
(iMat 17.14-21; iLuk 9.37-43)*

¹⁴ Abi e ke rọ ya kugbe eniyẹ odukhokho ni e kpọle ọ, e mẹ khi ebubu ẹgbọ o le gasẹ wẹ, esesẹ Ishi eyi iMosisi e nu wẹ la akaghọ khakọ. ¹⁵ Abi eni ẹgbọ e lesẹ mẹ iJesu te, abọ e sha wẹ egbegbọ. E na ya tẹ ọli.

¹⁶ Ọ mhila wẹ, “Elọ o khi ni a nu wẹ khakọ ọ shi?”

¹⁷ Ọmọse ọghuo ọ rọte elemhi eni ebubu ẹgbọ ya rue unu, ọọ, “Osẹsẹ, omimhẹ oni ọmọse mhi rọ bhale ghi ẹ, ayemhẹ obe ọ nasẹ ọli, ni ọa ke zẹ ọli ẹ ngme. ¹⁸ Ini oni ughuamhi o da tsua rughu ọli ne,

* **9:7** Li zẹ iMat 3.17; iMak 1.11; iLuk 3.22 † **9:7** Li zẹ 2 iPit 1.17-18 ‡ **9:11** Li zẹ iMala 4.5; iMat 11.14

eri o pfi ọli ẹ gbe, ọọ chi ofulu unu, ọọ le akọ unu, ọ zese a. Mhi gueye eniye odukhokho eyẹ e khu ọli oni ayemhe egbe-a, ama ẹa dobe.”

¹⁹ IJesu ọọ, “Eẹ egbo ni ẹa mhọli irudunga ena, ẹlẹ-ingme mhi ke mhọli rọ nu ẹ ya la akana, ẹlẹ-ingme mhi beşi ya la onana ramhi, Mu ọni ọmọ ghi mhe!”

²⁰ Igho e mu ọni ọmọ bhale. Abi oni ayemhe o rọ me iJesu tee, o de rughu ọni ọmọ, o pfi ọni ọmọ gbe, ọọ kpi abọ ali awe-a, oo wu ọli eke, ọọ chi ofulu unu.

²¹ IJesu ọ mhila ita ọni ọmọ, “Aẹle ọ te lina?”

Ọọ, “Abi ọ te khi ọmọ.” ²² “O she lina mu ọli pfi lo elemhi erali ali elemhi okẹ itingmingme abi o kha gbe ọli-a. Ini u mhọli emini u dobe ya riẹle, kpekpe le elemhi anye ni u kpaghiẹ anye obo.”

²³ IJesu ọọ, “Eri u we ini mhi dobe? Emhikpa ọọ tse na ọni ọ da mhọli irudunga.”

²⁴ Aghoaghọ ita ọni ọmọ ọ nyanya lie, “Mhi miesuọ ukukuọ, kpaghiẹ mhe obo ni mhi gbo miesuọ shi ọ egbegbo.”

²⁵ Abi iJesu ọ rọ me khi eni ebubu egbo e na bhale ashini oni ingme o de shi, ọ tseşe ku oni ayemhe obe. “Yeşe ayemhe unghenu ali ilesọ, rọte ọli egbe ya lasele, khi gbo nyene egbe bhale ọ ghue.”

²⁶ Oni ayemhe o tseşe, ri itoto nighise ọni ọmọ, ọ rọte ọli egbe ya fiẹ. Ọni ọmọ ọ ke li abi ọni ghua. Egbo e lie, “O she ghua.” ²⁷ Ama, iJesu ọ mu ọni ọmọ obo vule migha. Ọ migha.

²⁸ Abi iJesu ọ rọ lo elemhi owa se, eniye odukhokho eyọli e beña mhila li, “Elọ o ze ni anye aa rọ dobe khu ọli oni ayemhe egbe-a?”

29 Ijesu ọ sọ wẹ ọ, ọọ wẹ, “Iromhi isọsọ ali azumhi tse o dobe a khu onana.”

*Ijesu ọ gbo ngme ingme eghuli oyọli
(iMat 17.22-23; iLuk 9.43-45)*

30 Ijesu ali eniye odukhokho eyọli e rọte agho vu, e rọte iGalili dose, ọa nono ni ọgbokhoghuo ọ lese ashini wewe e la, 31 Itobo khi ọ sese eniye odukhokho eyọli, ọọ ye, “A ya ri Omi Ogbọ na egbọ de. E gbe ọli-a. Efe nuzi-esẹ ọ gbo guale.” 32 Ama emini ọ ngme ọa lo wẹ esọ, ulishi o mu wẹ abi e li ya mhila li emini ọ rọli ngme.

*Oni ọ fu ne nya
(iMat 18.1-5; iLuk 9.46-48)*

33 E bhale ọli iKapanomu. Abi ọ rọ la elemhi owa, ọ mhila wẹ, “Elo a khako shi amo abi a rọ la ode?”

34 Ama e tsaghię-a, itobo khi oni ọ kpeda nya elemhi wẹ e la ode khako shi. §

35 Ijesu ọ shito, ọ lu eniye odukhokho ogbava eyọli, ọọ wẹ, “Ini ọgbokhoghuo ọọ nono ni loli khi oni odode, ọ kpe ya ri egboli khi oni ọ kpukhokho nya, ali oni ọ ga egbọ nya.”*

36 Ọ mu ukuku ọmọ vule migha wẹ iteva. Ọ mu ọli shi abo, ọọ wẹ, 37 “Onini ọ ri itobo oyemhe mie ọtuoghuo ikuku eniye enana ne, mhemhe ọ mie. Onini ọ da mie mhe ne, oni ọ ghie mhe ọ mie, ọa khi mhemhe.”†

*Oni ọa da khi obe awa ne oyi awa ọ khi
(iLuk 9.49-50)*

§ 9:34 Li ze iLuk 22.24 * 9:35 Li ze iMat 20.26-27; 23.11; iMak 10.43-44; iLuk 22.26 † 9:37 Li ze iMat 10.40; iLuk 10.16; iJqn 13.20

³⁸ Iḵḵoni ọ́ọ́, “Ọ̀sẹ̀sẹ̀, anye mẹ ọ̀mọ̀sẹ ọ̀ghuo ni ọ́ ri eva oyẹ̀ khu ayẹ̀mhẹ̀ ebe kua. Ama anye gueyẹ̀ ọ̀li ọ́ khi gbo ligho, itobọ́ khi ọ́a khi ọ̀ghuo elemhi awa.”

³⁹ IJesu ọ́ wẹ̀, “A khi ke khu ọ̀li ọ́, itobọ́ khi ọ̀ni ọ́ ri eva oyẹ̀mhẹ̀ gbe akanya ọ̀nyalọ́a, ọ́a tigbe ẹ̀ vule ke ngme onobe oyẹ̀mhẹ̀. ⁴⁰ Itobọ́ khi ọ̀ni ọ́a khi obe awa, ọ́yawa ọ́ khi.” ‡ ⁴¹ Abi o li mhi li gue ọ̀li ẹ̀ yẹ̀ ẹ̀ khi, ọ̀nini ọ́ da diẹ̀ uko amẹ̀ na ẹ̀ da irari eva oyẹ̀mhẹ̀ ne, ali irari khi ọ̀nayi iKirisiti a khi, ọ́ ya mẹ̀ eleli ọ́. §

*A mu egbe ẹ̀ shi emini e yẹ̀sẹ̀ ọ̀gbọ́ ọ́ lamhẹ̀
(iMat 18.6-9; iLuk 17.1-2)*

⁴² “Ini ọ̀gbọ̀khọ̀ghuo ọ́ yẹ̀sẹ̀ ikuku eniyẹ̀ enana ni e mie mhẹ̀ suọ lamhẹ̀, o bie tinẹ̀ ni a gẹ̀ ẹ̀chẹ̀ iko oniẹ̀mhi shi ọ̀gbọ́ ọ̀ghọ̀ghọ́ uruli tsua pfilo elemhi okẹ̀ oniẹ̀mhi. ⁴³ Ini obọ́ oyẹ̀ o rẹ̀ ya lamhẹ̀, khi ọ̀li pfi. O ti ẹ̀ egbe nẹ̀ ini u waa mhọ́li obọ́ ya lo iloghie na agboagbo, ni u rọ́ tsua abọ́ eve-eva eyẹ̀ ya lo ilimhi iriẹ̀riẹ̀, ashini erali ẹ́a tigbe ẹ̀ pfo-a ghue.*

⁴⁴ [Akaghọ́ ikpatso ni ẹ̀ le wẹ̀ ni ẹ́a tigbe ẹ̀ ghu e la, ali ashini erali ni ẹ̀ tose wẹ̀-a, ẹ́a tigbe ẹ̀ pfu ghue.]

⁴⁵ Ini owe oyẹ̀ o rẹ̀ ya lamhẹ̀, khi ọ̀li pfi, o ti ẹ̀ egbe nẹ̀ ini u waa mhọ́li awe rọ́ lo iloghie na agboagbo ni u rọ́ mhọ́li awe eve-eva, ni u rọ́ ya lo ilimhi iriẹ̀riẹ̀.

⁴⁶ Akaghọ́ ikpatso ni ẹ̀ le wẹ̀ ni ẹ́a tigbe ẹ̀ ghu e la, ali ashini erali ni ẹ̀ tose wẹ̀-a, ẹ́a tigbe ẹ̀ pfu ghue. ⁴⁷ Ini ukpẹ̀loe oyẹ̀ o rẹ̀ ẹ̀ lamhẹ̀, vuonyo li pfi, o ti ẹ̀ egbe nẹ̀ ini u ri ukpẹ̀loe oghuo lo Eghiele oyi Eshinẹ̀gba, ocho ni u rọ́ ya mhọ́li ikpamhi alo eva, a pfi ẹ̀ ya lo ilimhi iriẹ̀riẹ̀. † ⁴⁸ Akaghọ́,

‡ **9:40** Li zẹ̀ iMat 12.30; iLuk 11.23 § **9:41** Li zẹ̀ iMat 10.42

* **9:43** Li zẹ̀ iMat 5.30 † **9:47** Li zẹ̀ iMat 5.29

“Ikpatsọ ni ẹ le wẹ
ni ẹa tigbe ẹ ghu e la,
ali ashini erali ni ẹ tose wẹ-a,
ẹa tigbe ẹ pfu ghue.”[‡]

⁴⁹“Erali a rọ nye ọgbọgbọ-a, a rọli khi ọni ọ pfuase
abi a li ri ugbheli ẹ ri iluasobo khi pfuase.

⁵⁰“Ugbheli o ma ti, ama ini oviọlọ oyọli o kala, se
o ke li ze gbolo rọ ya mele ugbheli-a?

“A ze ni a mhọli ugbheli shi agbọ oye ẹ. A nu egbe
ke ngeli angeli opfomhe.”[§]

10

Ijesu ọ ngme shi ingme ipfughue-a (iMat 19.1-12; iLuk 16.18)

¹ Ijesu ọ rọte aghọ vu je eke iJudia, ini a da
iJodani. Ighọ ẹgbọ ni e bu e gbo ve ngale deba li,
ọ sese wẹ abi ọ kpẹ li.

² Ẹgbọ iFarisi eghuo e bhale ya mu ọli fe, e mhila
li, “Ushi oyawa o lama, omose ọ khu ughue oyọli?”

³ Ọọ, “Elo iMosisi ọ gueye ẹ a ke li?”

⁴ E ke, “Eri iMosisi ọ lama omose ọ keke ebe ni a
rọ pfa ughue-a mhọli ughue ọli obọ, ọ khu ọli.”^{*}

⁵ Ijesu ọọ wẹ, “Itobọ khi udu oye ọọ gbe, iMosisi
ọ rọ lighọ keke oni ushi na ẹ. ⁶ ‘Ama omose ali
ọkpotso, Eshinegba ọ rọte igbaekele agbọ ma wẹ.’[†]
⁷ ‘Onana o ze ni omose ọ rọ ọ pfi itali ali inyọli shi
eke, ọ ya toma ughue ọli ọ. ⁸ Wewe aava e mele
idiegbe oghuo a.’ Eghẹghẹ aghọ ẹa ke khi etuava,

[‡] **9:48** Li ze Aza 66.24 **§ 9:50** Li ze iMat 5.13; iLuk 14.34-35

^{*} **10:4** Li ze iDeut 24.1-4; iMat 5.31 [†] **10:6** Li ze Igbae 1.27; 5.2

ama oghuo.‡ 9 Irarigho, emini Eshinegba o da toma ne, oghokhoghuo o khi vase we a.”

10 Abi e ro gbo la elemhi owa, eniye odukhokho eyi iJesu e mhila li ogbo ona. 11 IJesu oo we, “Onini o da khu ughue oli ni o ya rue okpotso olese ne, eri o kia okia shi oni ughue oli o. 12 Ini oni okpotso o lase ayi odoli le khi o ya ngeli na omose olese, eri o kia okia.”§

Ijesu ali eniye enikeke

(iMat 19.13-15; iLuk 18.15-17)

13 Egboghuo e mu eniye bhale deba iJesu ni o ri obo ti we, ama eniye odukhokho eyoli ee khu we.

14 Abi iJesu o ro me gho, o ri elemhi bi oli. Oo we, “A ze ni ikuku eniye e bhale deba mhe. A khi ke khu we, itobo khi enabi wewe e li mholi obo shi Eghiele oyi Eshinegba. 15 Ze mhe gue igesikia ye e khi oni oa da rue Eghiele oyi Eshinegba abi eniye enikeke ne, oa tigbe ya lo iloghie.”* 16 O muno eniye shi egbe, o ri obo nga we ukhomhi, o so iromhi na we.

Ozele-omose ni o lolo pfue

(iMat 19.16-30; iLuk 18.18-30)

17 Abi iJesu o ke rue okiali eke khi o vu, omose oghuo o na bhale ya wugha li odalo, oo li, “Osesete nete! Elo mhi ya rielete ni mhi ro ya mhue agbo na agboagbo?”

18 IJesu o li, “Elo e ze ni u ro o lu mhe onoti. Oghokhoghuo oa lao ni o ti, se ni Eshinegba. 19 Ni mhi ro so e ogbo ni u mhila mhe, u lese ushi ni Eshinegba o ro shi eke. Ni o le, ‘A khi gbe ugbeli, a khi kia okia,

‡ 10:8 Li ze Igbae 2.24 § 10:12 Li ze iMat 5.32; 1 iKori 7.10-11

* 10:15 Li ze iMat 18.3

a khi do ughiato, a khi pfi otselę egbhọli mu ogbọ, a khi li ogbọ le, mu ekpe na ita ę ali inye ę.”†

²⁰ Oni ozeo oọ, “Osese, abi a te bia mhe mhi te ri ena nya a gbe akanya.”

²¹ Ijesu o ri eloe inono bino oli, oọ li, “Emhi oghuo tse o kpe ę le ni waa riele ne. Je ya ri emini u mhọli nya de ni u kemhi we na eni ęa mhọli emhi, ęghęghę aghọ ni u mhọli epfue shi obini iloghie, u tigbe bhale ya deba mhe ke kia.”

²² Abi oni omose o ro suo ona, alo eyoli e yese a, o ri iyeseudu-a ya vu, itobo khi o mhọli epfue eniemhi.

²³ Ijesu o bino gasę kpa, oọ eniye odukhokho eyoli, “O ma mu ogbọ ni o pfue unu ni o ro lo Eghiele oyi Eshinegba.”

²⁴ Ingmemhi eyoli e ri abo sha eniye odukhokho eyoli. Ama ijesu o gbolo ę, “Eniye eyemhe, o ma mu eni e ri egbe da epfue oyewe unu ni e ro lo Eghiele oyi Eshinegba. ²⁵ Ni ogbọ ni o pfue o ro lo Eghiele oyi Eshinegba, o ya munu dose, ni ogbọ ke dua ni loli ri alakumi rote ese asuge ya fie.”

²⁶ Ona o ke ri abo sha eniye odukhokho eyoli ne, e ro mhila egbe, “Oghuo o dobe ya lo o sho?”

²⁷ Ijesu o pfi ukpeloe bino we, oọ, “Ona ọa ze ogbọ ya li ama emhikpa o ze Eshinegba a li.”

²⁸ IPita oọ ijesu, “Emhinya anye tsua kua bhale deba ę.”

²⁹ Ijesu oọ we, egbegbi-ingme mhi gue ę ye ę khi onini o da pfi apfe oli shi eke, ali inyoghuo oli eni emose ali eni ikpotso, ali ita ali inyo, ni o pfi eniye ali ishemhi, ghe owolo shi eke irari oyemhe

† **10:19** Li ze Okiali 20.12-16; iDeut 5.16-20

ali usomhi onete oyi Eshinegba, ³⁰ a ya somhi ọli opfa. Elemhi agbọ ona, a ya khivoṣe na li asha egbhueshe, ikhivoṣe owa ali ikhivoṣe inyoghuo, ali inyọ ali eniyẹ ali ishemhi, ali anasemhẹ. Ọ ya mhue agbọ na agbọagbọ, elemhi agbọ ni o kẹ ẹ bhale. ³¹ Ama ẹgbọ eghuo ni e ralo, e ya kpẹ ukhokho. Eni e kpẹ ukhokho amo, e ya khi eni odode.‡

*Ijesu ọ gbo ngme ingme eghuli oyọli utonuzi-ese
(iMat 20.17-19; iLuk 18.31-34)*

³² Abi ijesu ọ rọ tsua wẹ lẹ iJerusalemu, ni ọ rọ ralo na wẹ, eni ingme e pfuse ghagha a shi eniyẹ odukhokho eyi ijesu udu. Ulishi o mu ẹgbọ ni e deba wẹ. Ighọ ijesu ọ gbo li rue eniyẹ odukhokho ogbava eyọli ye ochi, ọ gueye wẹ emini lọli ya mẹ ini wẹwẹ e ramhi iJerusalemu. ³³ Ọọ, “iJerusalemu awa je ena, a ya la oobọ rue Omi ọgbọ na ighie eyi ekpodalo-ugamhi ali eni ẹ sẹsẹ ishi dẹ, a ri ọli na wẹ mu. E pfa ẹzọ igbe-a mu ọli, e ghi ọli abọ ghi ẹgbọ iJeta. ³⁴ E ya rọli ke li egia, e tono etẹ ku ọli, e gbe ọli itẹ, e tigbe gbe ọli-a. Ama ẹlẹ nuzi-ese, ọ ya rọte eghuli guale.”

*Emini iJemhisi ali iJoni e mhila ijesu ọ riele na ewe
(iMat 20.20-28)*

³⁵ Ighọ iJemhisi ali iJoni imi iZebedi e bhale deba ijesu, ẹ ọli, “Oṣeṣe, anye ẹ nono ni u riele emini anye ya mhile ena na anye.”

³⁶ Ijesu ọọ wẹ, “Elo a nono ni mhi riele na ẹ?”

³⁷ E kẹ, anye ẹ nono, ini u da shito ukpekhomhi oye obini Eghiele oniemhi oye ne, ni u ze ni

‡ **10:31** Li ze iMat 20.16; iLuk 13.30

oṭuoḡhuo anye o kha shito e ukiękie obita, oṅokpole o shito e obogobo.

³⁸ Ijesu oḡ we, “Aa lese emini aa mhila. Uko ni mhi roṭe da, a doḡe ya roṭe o da, abi khi eri a doḡe ya mie ibatizi onabi mhi mie?”[§]

³⁹ E ke, “Anye ya doḡe.” Ijesu oḡ we, “A doḡe ri uko ni mhi ro da ya da, a gbo doḡe mie ibatizi onabi mhi mie, ⁴⁰ ama mhia mholi afu ni a ro ri oḡbo o shito mama mhe ukiękie obita ali obogobo ukpekhomhi oghie obini iloghie. Eshineḡba o ri asha eghoḡho ya na eḡbo ni o re we shi agho khe.”

⁴¹ Abi eniye odukhokho etuogbe enekpole e ro suo ingmemhi ena, e nu iJemhisi ali iJoni i wola shi o. ⁴² Igho iJesu o lu we tiggili, oḡ we, “A lese khi eni e lu egbewe ighie eyi eḡbo eni ea ya ga Eshineḡba, khi eri e li we abi o ghole we, igho eni e kpeda omheḡe e li e mheḡe na we. ⁴³ Ama, a khi li abi wewe. Ama onini o nono ni loḡi khi oniemhi elemhi e, o khi oni o ga ee nya.* ⁴⁴ Onini o nono ni loḡi khi onodode, oḡ mema kpe ri eḡboḡi khi oghumha oyi eḡbo kpa.† ⁴⁵ Itoboḡo khi Omi Oḡbo oa bhale ni a ke ga li, ama eri o bhale ya ga ali ni o gbo ri agbo oyoli bhale ni a ro luase obo na ebubu eḡbo.”

*Ijesu o ri iBatimeusi otase-alo-a ze
(iMat 20.29-34; iLuk 18.35-43)*

⁴⁶ Igho e bhale iJeriko. Abi iJesu ali eniye odukhokho eyoli ali ebubu eḡbo ni e deba li, e ro roṭe oni eoli vu, omose oḡhuo ni o tase alo-a na lui iBatimeusi (omi iTimeusi a ri iBatimeusi ngme) o shito epfe ode mhila omhila. ⁴⁷ Abi o ro suo khi

[§] **10:38** Li ze iLuk 12.50 * **10:43** Li ze iLuk 22.25-26 † **10:44** Li ze iMat 23.11; iMak 9.35; iLuk 22.26

iJesu ɔna iNazareti lo, ɔɔ tsese leghe, ɔɔ lie, “iJesu omi iDefidi, kpekpe, le elemhi mhe.”

⁴⁸ Ebubu egbɔ e tsese ku ɔli, ee ɔli o ze ni a suo esɔ. Ama eena o mema lolo pfi okokokhue lu ɔli ne, “Omi iDefidi le elemhi mhe!”

⁴⁹ iJesu o migha, ɔɔ, “A lu ɔli na mhe.” Igho e lu oni ɔtasalo-a, e ɔli, “Ke ghele, vule, khi ɔɔ lu e.” ⁵⁰ O rue awulu no o so pfi a, o ti vule pia bhale deba iJesu.

⁵¹ iJesu o mhila li, “Elo wa nono ni mhi riele ne?”

Oni omose ni o tase alo-a, ɔɔ, “Osese, mhia nono ni mhi gbo ke me eke.”

⁵² iJesu ɔɔ, “Ke le, khi irudunga oye o she re ze.” Aghoagho, ɔɔ me eke, o deba iJesu rote ode vu.

11

Egbɔ e ri ufumhi na iJesu abi o ro lo iJerusalemu (iMat 21.1-11; iLuk 19.28-40; iJon 12.12-19)

¹ Abi e ro ti ramhi iJerusalemu ni e ro bhale iBetifagi ali iBetani Udi Ute Olivu, iJesu o ghie etu-ava elemhi eniye odukhokho eyoli, ² Oo we, “A je eoli ni o la odalo oobɔ egho. A kha lese lo oni eoli le, a ya me omi akphere ni a muzu, ni ogbokhoghuo ɔa nga shitɔ ghue. A taghie ɔli bhale ana. ³ Ini ogbokhoghuo o mhila e, ‘Elo o ze ni a ro taghie ɔli? A gueye ɔli khi, Onomhue ɔɔ nono ni loli ri ɔli riele emhi, ali khi o gbo roli bhale ya shi eke lena.’ ”

⁴ Igho ee bhale ya e oni ozele akphere ni a muzu shi ifui apfe epfe ode. Abi e li taghie ɔli-a, ⁵ egbɔ eghuo ni e migha akagho e mhila we, “Elo a la akagho a riele ni a ro taghie oni omi akphere ogho-a?” ⁶ E so we o abi iJesu ɔɔ e li so we o. Igho eni

ẹgbọ e zẹ wẹ vu. ⁷ Abi e rọ mu ọni ozele akphẹrẹ bhale ghi iJesu se, e banọ ide egbe-a pfino nga ọni ozele akphẹrẹ ukhokho. Ighọ, iJesu ọ nga li shitọ. ⁸ Ebubu ẹgbọ elese e li ba ide rọ ku ode, eghuo, e nyanọ eyamhi ku ode. ⁹ Ẹgbọ ni e ralo ali eni e deba li e gbe ukua, e tsese, e lie,

“Okuekhoogo! Oolo!”

Ẹshinegba ọ ka khivose
na ọni ọ ri eva oyi
Ọnọmhue bhale!*

¹⁰ “Ẹshinegba ọ ka khivose
shi Eghiele oyi oghie iDefidi
ita awa ni ọọ bhale.”

“Tkuẹghie o khi oyi Ẹshinegba!”

¹¹ Abi iJesu ọ rọ ramhi iJerusalemu, ọ dose ya lo elemhi Owa oyi Ẹshinegba. Ọ bino emhi nya gase, ama aborokhia khi obili o she bi dose, lofi ali eniye odukhokho ogbava eyọli e je iBetani.

*Ijesu ọ pfi unu na ọọra ọkhua-eni
(iMat 21.18-19)*

¹² Ogbeakolo abi e li rọte ẹoli iBetani fiẹ, okiamhi oo gbe iJesu. ¹³ Ighọ ọ tapfia me ọara ọkhua-eni ni o guẹ ta ebe. Ọ le ya bino ini o she mo udumhi. Abi ọ rọ ramhi aghọ ọa me emhikhoghuo ọ, se ni ebe, itobo khi ọa ramhi ẹgheghe ni ọkhua-eni e rọ mo ne. ¹⁴ Ighọ ọọ oni ọkhua-eni, “Ogbokhoghuo ọa ke gbo rọte ẹ ukhomhi ya pfa udumhi ghue.”

Eniye odukhokho eyọli e suọ khi ọ ngme na.

*Ijesu ọ je Owa oyi Ẹshinegba
(iMat 21.12-17; iLuk 19.45-48; iJon 2.13-22)*

* **11:9** Li zẹ Iwolo 118.25-26

15 Abi e ke rọ ramhi iJerusalemu, iJesu o lo Owa oyi Eshinẹgba, o vẹse eni e la akaghọ du oki kua. O kpha okphẹ oyi eni e pfa ikpaghọ ali eni e ri inekhukhu de kua. 16 Oa ze ni ogbokhoghuo o tsua itsua-okì rọte elemhi apfe oni Owa oyi Eshinẹgba dose. 17 Abi o ke rọ sese egbo, o rọ lie, “A she kpe keke oli shi Ebe-no-pfuase khi, “Owa iromhi oyi ishishi nya, a ya ke lu Owa oyemhe,”

Ama ee, a she rọli mele owa ighiatọ a.”†

18 Abi ighie eyi ekpodalo-ugamhi ali eni e sese ishi e rọ suọ ona, ee dua ode ni e te me asha ya gbe iJesu a. Ama ulishi oyi iJesu oó mu we, itobo khi eri osese oyoli o ri abo sha egbo kpa.

19 Ogbomhi o mu eke, iJesu ali eniye odukhokho eyoli e rọte oni eoli ya fie.

*Ilẹsingme ni a rọte okhua-eni ni o ku ebe a rue
(iMat 21.20-22)*

20 Eluzogbe oogbeakolo khi e rọte oni ode dose, e me khi oni oara okhua-eni o khakha ya ramhi imhili. 21 IPita o sato, oo iJesu, “Osese, bino khe! Oara okhua-eni ni u pfi unu na o she khakha-a.”

22 IJesu o so li o, oo, “Mholi irudunga na Eshinẹgba.” 23 “Egbegbi-ingme mhi gue e ye e khi onini o gueye oni ute ona, ‘Rọ te akana lasele ya je elemhi okẹ oniemi,’ ni o rọ da mholi akhokhomhe shi udu shi emini o ngme ne, ni o rọ mholi miesuo khi emini loli ngme o ya bhale ya tse, oo ya ligho na li.‡ 24 Irarigho, emiemini u so iromhi mhila, miesuo khi u she mholi oli, oye o ke khi. 25 U kha

† 11:17 Li ze Aza 56.7; iJere 7.11 ‡ 11:23 Li ze iMat 17.20; 1 iKori 13.2

da migha a lema, ni u rọ ri ingme oyi ọgbọ shi elemhi, nyanya rọ topfa li. Ini itẹ ni ọ la iloghie ọ ri olamhẹ eyẹ li topfa ẹ.”²⁶ “Ama ini u waa da rọ topfa ọgbọese ne, itẹ na iloghie ọa ya li ri olamhẹ eyẹ topfa ẹ.”[§]

*A mhila iJesu ọni ọ ri afu na li
(iMat 21.23-27; iLuk 20.1-8)*

²⁷ Ighọ ee gbo lo iJerusalemu le. Abi iJesu ọ li kia elemhi apfẹ Owa oyi Eshinẹgba gase, ighie eyi ekpodalo-ugamhi ali eni ẹ sese ishi ali egbhali e bhale deba li. ²⁸ E mhila li, “Oghuo ọ ri afu nẹ ni u rọ riẹlẹ eni emhi enana nya, oghuo ọ ri unu nẹ u ke riẹlẹ ena.”

²⁹ IJesu ọ sọ wẹ ọ, Ọ́ọ́, “Mhi ya mhila ẹ ogbọ oghuo. A sọ mhẹ ọ, ni mhi tigbe gueyẹ ẹ ọni ọ ri afu na mhẹ mhi ke riẹlẹ emhi ena. ³⁰ Oghuo ọ fẹ ri itoto na iJoni ọ ke batazi egbọ abi egbọ?”

³¹ Ighọ, e ya ye egbe ochi, e nu egbe wẹ ngme ọli khi, “Awa khẹ ‘Rọte iloghie’ lọ, ọ ya mhila awa, ‘Elo o zẹ ni aa rọ mie ọli suọ?’ ³² Ama ini awa kẹ, ‘Obọ oyi egbọ.’ ” Ulishi oyi egbọ o mu wẹ, itobọ khi ọgbọkpa ọ lẹsẹ khi ọmekeguele iJoni ọ khi.

³³ Ighọ ẹẹ iJesu, “Anye ẹa lẹsẹ.” Ighọ iJesu ọọ wẹ, “Mhi aa ya li gueyẹ ẹ ọni ọ ri afu na mhẹ mhi rọ ke riẹlẹ eni emhi ena.”

12

*Okhẹ irọkhọkhọ oyi eni e ngmomhi shi ogba ẹẹra
ipfonu
(iMat 21.33-46; iLuk 20.9-19)*

§ 11:26 Li zẹ iMat 6.14-15

1 Igho iJesu o ke ri okhe irokhokho sese we. Oo, "Omose oghuo o ke ya gua ogba era ipfonu. O ma ugbe gashe oni ogba. O to eshe shi o, ni a mino ameh ikpamhi eni era kulo. O gbo to owa ni o yagha ni a la khe-ekhe shi o. Igho o ya ri oni ogba nga eghiale eghuo obo e nu loli ri ukpeloe ke khu. O vu asha obini odonue.* 2 Egheghe ikhieshe o ramhi, oni omose o ghie oghumha oyoli ghi eni o ri ogba nga obo, o le ya mie we idumhi emhi ni a ko shi oni ogba bhale ghi lue. 3 Ama e mu oli, e gbe oli, e khu oli. O pfino abo efue ya je. 4 O gbo ghie oghumha oyoli olese ghi we, E pfi emhi shi oli ukhomhi, e yeghe oli-a 5 O gbo ghie olese, e gbe onana-a. O ghie elese ni e bu, e gbe eghuo itali, e gbolo eghuo-a.

6 "O kpoli oghuo le ni oa ghie ne, ikhi omi oli ni o lolo nono ingme oyoli. Loli o kpukhokho ghie. O sa, oo, 'E ya mu ekpe na omi mhe.'

7 "Ama eni e la oni ogba, ee egbewe. 'Ona o ya le ugu oni ogba ona, a bhale ni awa gbe oli-a. Egheghe agho ni oni ugu o mele oyawa-a.' 8 Igho e mu oli, e gbe oli-a, e pfi oli rote oni ogba ya lase.

9 "Se oni o mholi oni ogba ona o fe ya li? Eri o bhale ya gbolo eni egbo ni o ri oni ogba nga obo-a, o rue oni ogba na egboese. 10 Aa she ze oli Ebe-nofuase khi.

" 'Eche ni itsona e kie pfi,
 loli o ke ya mele egbegbi eche
 ni o ke mu eloe ne nya-a.

11 Onomhue o ligho riela ona,
 o o ti anye eloe gba' "†

* 12:1 Li ze Aza 5.1-2 † 12:11 Li ze Iwolo 118.22-23

¹² Igho egbhali eyi egbo iJu, e nono ode ni e te ya mu iJesu, itobo khi e lese khi wewe o ri oni okhe irokhokho ona nu ngme. Ama e na ulishi oyi ebubu egbo ni e la agho, e ze oli obo, e vu.

Ingme izẹ oga na iSiza

(iMat 22.15-22; iLuk 20.20-26)

¹³ Igho e tigbe ya nyene egbe ya ghie iFarisi eghuo ali eniye odukhokho eyi Erodu ghi iJesu, ni e me asha rote emini o ya ngme ri ingme de oli.

¹⁴ Igho e bhale deba iJesu, ee oli, "Osese, anye lese khi u ma ngme igesikia, khi emiemini egbo ee ngme ali emiemini ogbo o khi o ya mu e loe, ama ode oyi Eshinegba wa sese ni o te ode igesikia. Mhie i, o famhi ti abi khi o ti elemhi ushi, ni a ro ze oga na oghie iSiza?" ¹⁵ Anye ke ze, abi anye khi ze?"

Ama iJesu o she me ikpamhika oyewe. Oo we, "Elo o ze ni a ro nono ni a di mhe mu? A rue ukpamhi anini bhale ghue ni mhi bino." ¹⁶ E rue oghuo bhale ghi oli, oo we, "Alo ali eva eyi oghuo na ni a mu shi o ena?" Ee oli, "Eyi iSiza lo."

¹⁷ IJesu oo we, "A ri emini o khi oyi iSiza na iSiza, a ri emini o khi oyi Eshinegba na Eshinegba."

Igho ingme oyi iJesu o sha we abo.

Ingme iteghuli-guale

(iMat 22.23-33; iLuk 20.27-40)

¹⁸ Igho egbo ena otu na lui iSadusi ni ee sese khi ite-eghuli-guale o ya la ikpukhokho agbo, e bhale deba iJesu ya mhila li ogbo.† ¹⁹ Ee oli, "Osese, iMosisi o keke oli shi ebe ushi na awa khi, 'Ini omose o ghu-a pfi ughue oli shi agbo, ni o ro bia omo na li, inyoghuo oni omose o mema rue oni

† 12:18 Li ze Ika 23.8

osamhi-olimhi ughue ni o bia eniye na oni okpotso na inyoghuo oli ni o ghu-a ogho'S ²⁰ Egheghe oghuo o ya la o, a me emose oshilua ni e khi inyoghuo. Oni ogbhali o rue okpotso. Oni omose ya ghua, o bia omomo na oni okpotso. ²¹ Inyoghuo oli ni o o de ba li o ke rue oni okpotso, o gbo ghua, o bia omomo. Igho o gbo li inyoghuo oli onuzase. ²² Igho o gbo li khi eni inyoghuo oni omose ni e kpole nya. Eni inyoghuo oshilua nya e ga rue oni okpotso ughue ni e a bia omomo okhoghuo na li. Ikpukhokho o, oni okpotso o li ghua. ²³ Ini ogbele iguale o ramhi, ni eni e ghua nya e ro guale, oghuo o famhi ya khi ughue oni okpotso? Aborokhia khi wewe oshilua nya e ga rue oli ughue egho."

²⁴ IJesu o so we o, Oo, "Wa a me khi eri a da ode khi aa lese emhikhoghuo elemhi Ebe-no-pfuase, wekhi eri a lese emhikhoghuo elemhi ekpabo oyi Eshinegba. ²⁵ Ini eni e ghu-a e guale, e a ke ke rue ughue wekhi eri a ke re we ke ye ughue. Eri e ke li abi igeni ena iloghie. ²⁶ Ama ingme iguale oyi eni e ghua, aa she kpe ze oli ebe ni iMosisi o kekere ni o ngme ingme ebuli ni oo to shi? Abi Eshinegba o gweye iMosisi khi, 'Mhemhe mhi khi Eshinegba oyi Aburaamu ali Eshinegba oyi Aziki, ali Eshinegba oyi iGiekopu.*' ²⁷ Eshinegba oyi eni e la agbo o khi, o a khi oyi eni e ghua. Eri a ga da ode pfo nya." Emini a ri ona ngme khi, egbo eni ghu-a eghuo e kie mholi agbo.

Ushi ni o fune nya
(iMat 22.34-40; iLuk 10.25-28)

§ 12:19 Li ze iDeut 25.5 * 12:26 Li ze Okiali 3.6

28 Otuoghwo eni e sese ishi, o la agho suo abi e ro khako, o me khi iJesu o ga gue so egbo iSadusi ogbo ni e mhila li, o mhila li, “Elemhi ishi nya, onoghwo o ga fune nya?”

29 IJesu o so li o, o, “Oni o mu eloe ne nya na, ‘Ku esọ-a yeye iZireni, Onomhue Eshinegba oyawa, lolighuo kpe o khi Onomhue. 30 Nono ingme oyi Eshinegba Onomhue oye, ri udu oye nya ali agbo oye nya, ghe isamhi ali ekpabo eye nya nono ingme oyi Eshinegba.’† 31 Onuzi-eva ni o gbo lolo mu eloe khi, ‘Nono ingme oyi onuzava oye abi u li nono ingme egbe e.’ Ushi olese okhoghwo o ke la o ni o gbo mu eloe dose ena.”‡

32 Oni omose o, “U ga gue ngme, Ose. Igesikia u ngme ni u we khi Eshinegba oghuo o khi, ali khi olese o ke la o, se ni lolighuo. § 33 Ali khi awa ri udu oyi awa nya, ali isamhi eyi awa ali ekpabo eyi awa nono ingme oyi Eshinegba. Ali awa nono ingme oyi onuzava oyawa abi awa li nono ingme egbe awa. Ni awa ro ri ishi eva ena gbe akanya, o ghole Eshinegba dose ni awa ya ri iluasobo ali isomhopfa ododa bhale ghi o.”*

34 Abi iJesu o ro me ileasingme ni o ro so lue o, iJesu o o li, “Wa a ga nuata shi Eghiele oyi Eshinegba.”

Rote agho vu ogbo okhoghwo o ke gbolo mhila li ogbo okhoghwo.†

Omi oni Omiepfuese o khi
(iMat 22.41-46; iLuk 20.41-44)

† 12:30 Li ze iDeut 6.4-5 ‡ 12:31 Li ze iLev 19.18 § 12:32 Li ze iDeut 4.35 * 12:33 Li ze Osia 6.6 † 12:34 Li ze iLuk 10.25-28

³⁵ Abi iJesu o rọ la elemhi apfe ni o la Owa oyi Eshinegba sese egbo, o mhila we ogbo. Ofo, Elo o ze ni esese Ishi eyi iMosisi e rọ lie khi omi iDefidi Omiepfuese o khi? ³⁶ Abi Ayemhe-no-pfuase o rọ kpha iDefidi so, o rọ rote unu oyoli lie.

“Eshinegba ofo, Onomhue oyemhe.

Shito mama mhe

ramhi egheghe

ni mhi rọ ya ri ebe e

shi e ufui ekoawe.’”[‡]

³⁷ Ini iDefidi o rote unu oyi lolighuo lu oli Onomhue, se oni Onomhue oyoli o ke gbo lie khi omi oli?

Ebubu egbo e ku esọ a shi eke shi emini o ngme, ni o ri egbe mu we.

Ijesu o tse agua ye eniye odukhokho eyoli shi esese Ishi eyi iMosisi egbe

(iMat 23.1-36; iLuk 20.45-47)

³⁸ Ijesu o sese we, Ofo we, “A mu egbe e shi esese Ishi eyi iMosisi egbe. Itsua na dolodolo e ma ghole we e iso ke kia ifui oki, ni egbo e ke tse we otse ekpe. ³⁹ E ma nono ni wewe e shito ukpekhomhi ni o mu eloe elemhi owa ugamhi oyi awa ali ashini o mu eloe elemhi ilegba, ni a la le, ni a la da.

⁴⁰ Itoto e rọ li esamhi-olimhi e le. Iromhi ni e nue, eyi abamemhe, e so. Eshinegba, o ya na we osoli oniemi to o.”

Irona ni osamhi-olimhi o rọ na Eshinegba

(iLuk 21.1-4)

⁴¹ Abi iJesu o rọ shito ti mama oni akpati ni a pfi ukpaghọ irona a lo elemhi Owa oyi Eshinegba, ofo bino egbo abi e li pfi ikpaghọ lo o. Egbo ni e pfue

[‡] 12:36 Li ze Iwolo 110.1

ebubu e pfi ikpokpomhi ikpagho lo. ⁴² Igho osamhi-olimhi ni o a mhue emhikhoghuo, o li ya pfi anini eva lo.

⁴³ Igho iJesu o lu eniye odukhokho eyoli, Oo we, “Igesikia mhi gue e ye e, khi oni osamhi-olimhi ni o a mholi emhikhoghuo ona, loli o ri irona ni o fune nya bhale dose egbo enekpole nya ⁴⁴ Itobo khi eri eni e pfue e rote epfue ni e mhue mu epfie ro riele irona. Ama oni osamhi-olimhi ona, rote elemhi umhame oyoli, o kie rue emini o mholi nya ni o kha ro ke le, riele irona.”

13

*Ijesu o guele emini a ya ke me ikpukhokho agbo
(iMat 24.1-2; iLuk 21.5-6)*

¹ Abi iJesu o rote elemhi Owa oyi Eshinegba fie lasele tee, omoo odukhokho oyoli oghuo, oo li, “Bino ghue, Osese! Ghe abi ukpokpomhi owa ona ali echu ni a ro ma li e li somhi otse khe!”

² Ijesu o so li o, oo, “Wa me ukpokpomhi owa ona. Eghenge o ya bhale ni echeli okhoghuo o a ke ro ya migha ukhomhi okhoghuo. Wewe nya e ya de kua.”

*Ozughu ali Imu-okholi vule
(iMat 24.3-14; iLuk 21.7-19)*

³ Abi iJesu o li shito ukhomhi Ute era Olivu, ni o so alo ghue oni Owa oyi Eshinegba, iPita ali ijemhisi ali ijoni ali Aduru e bena bhale ya mhila li, ⁴ E o li, “Gueye anye, eghenge ni a ro ya ke me eni ingme enana. Elo a ya ke me ni a ro ya lese khi oni eghenge ni eni emhi ena e ro ya tse khi o she ramhi?” ⁵ Igho iJesu oo we, “A kuegbe-a ke tokpe, ini ogbokhoghuo o khi di e. ⁶ Ebubu egbo e ya ri eva

oyemhẹ bhale deba ẹ, ẹ liẹ khi, ‘Mhẹmhẹ mhi khi loli,’ ẹẹ di ebubu ẹgbọ. ⁷ Ini a suọ khi a khọli, o ke khi eri a suọ eko ingme okhọli obini odonuẹ, a khi ze ni o nighise ẹ udu. Emhi eghoghọ e mema bhale ya tse, ama ukpẹsẹ agbọ ọa kie ramhi. ⁸ Ishishi ali ishishi e ya mu okhọli vule shi egbe ọ, eghiele ali eghiele e ya li mu okhọli vule shi egbe wẹ ọ. Eke ọ ya la asha kpa ke nighise, ẹẹ kulufe. Okiamhi oniẹmhi ọọ pfi. Igbaekele osoli na abi ọọ li ọkpotoso ni oku o lesẹ belete to egbe.

⁹ “A ri ukpeloe shi eke lolo ke tokpe. A ya mu ẹ je owa ni a la gue ezọ. A la elemhi Owa ugamhi gbe ẹ. A ya ri itobọ oyemhẹ mu ẹ bhale odalo oyi enighie ali eni ẹ mhese ni a rọ gue usomhi onete oyi Eshinegba ye wẹ. ¹⁰ Ama neni ukpẹsẹ agbọ o ya ramhi, a mema she ya tse abọ oni usomhi onete oyi Eshinegba ye ẹgbọ na ishishi nya. ¹¹ Ini a da mu e bhale khi a re ẹ gue ezọ, khi ze ni udu o nase ẹ shi emini u ya ngme. Ama lesẹ ngme emiemini Eshinegba o ya rọ ne oni eghẹghẹ aghọ, itobọ khi ọa khi yeye wa ngme, ama Ayemhẹ-nọ-pfuase.*

¹² “Egbọ e ya ri inyoghuo wẹ bhale na gbolo-a, ita e li ri imi wẹ li bhale ni a li gbolo-a. Eghẹghẹ aghọ, eniyẹ e ya ke sọ alo okhọli ghue eni e bia wẹ ọ, e gbolo wẹ-a. ¹³ Egbọ nya e ya ri itobọ oyemhẹ ke biselemhi ẹ, ama oni ọ ri egbe mie ya ramhi ukpẹsẹ, a ya mie pfuese.†

*Emhi obe ni ọọ vese egbo kua
(iMat 24.15-28; iLuk 21.20-24)*

* **13:11** Li ze iMat 10.17-20; iLuk 12.11-12 † **13:13** Li ze iMat 10.22

14 “Ama, a kha da me emini e pfi oyese, ashini aa kha me oli, ikhi oni o vese egbo kua, egheghe agho oni o ze ebe o lese abi a ri emini o ze ngme. Eni e la eke iJudia e na nga ikhomhi ite.‡ 15 Oni o la ukhomhi owa ne o khi tiemhile elemhi owa ya rue emhikhoghwo. 16 Oni o la ifui ishemhi o khi na bhale apfe ya rue awulu oyoli.§ 17 O ma ze mu ikpotso ni e me ali eni e mholi eniye ni e nye enyeli shi egbe egheghe agho. 18 Lema Eshinegba o khi bie ze ni o de shi egheghe ni ulili oniemi o la gbe egbo elemhi ukpe. 19 Itobo khi onana o ya khi osoli ni o kholo ne nya rote egheghe ni Eshinegba o te ma agbo. Ogb o a ke gbo ya me osoli uza onana ghue eke agbo.* 20 Ini Eshinegba o a li rote ogbele osoli ni a ngme ena khi-a, ogbokhoghwo o a ya dobe ji ukhomhi o le. Ama irari oyi egbo eyoli ni o ze oda ke, o ro rote eni ogbele osoli ena khi-a. 21 Egheghe agho ini ogbokhoghwo o gueye, ‘Ghekhe, ghe Omiepfuese!’ Okekha khi eri o ye, ‘Ghe oli oobo khe!’ Khi mie oli suo. 22 Itobo khi iromhi emiepfuese ali emekeguele e ya lasele. E ya ke ri ele olele ali ikanya onyaloa ododa ro ke di egbo. Ni o kha khi ini o a gue kia, e ga li ya di egbegbi eni Eshinegba o ze oda ke. 23 Irarigho, a ga lolo kuegbe-a ke to elo eke. Mhi she gue emhi nya ye e shi eke se neni oni egheghe o ya ramhi.

Inyenege bhale oyi Omi Ogbo

(iMat 24.29-31; iLuk 21.25-28)

24 “Ini egheghe osoli ona o ga dose se nya,
“ ‘Ovo o ya bishi alo-a,

‡ 13:14 Li ze iDan 9.27; 11.31; 12.11 § 13:16 Li ze iLuk 17.31

* 13:19 Li ze iDan 12.1; Iro 7.14

uki ọa ke doḅe ge,[†]
 25 Ikpẹtata e deno ukhuli kule,
 ukhuli ali ekpabọ
 ni e la irarogbe ẹ mhẹsẹ
 e ya ke nighise.[‡]

26 “Egheghe aghọ, ẹgbọ nya e ya mẹ khi Omi Ọgbọ
 ọ kia elemhi otughunu ẹ bhale, elemhi ekpabọ ali
 ufumhi ni ọ ge nyanyanya. § 27 Egheghe aghọ, ọ ya
 ghie igeni eyọli e te asha kpa, ikhi ukpẹsẹ agbọ nya,
 ti ẹgbọ eyọli ni ọ zẹ ọda kẹ gbili.

Oṣeṣe oyi oni ọọra ọkhua-eni
(iMat 24.32-35; iLuk 21.29-33)

28 “Bino abi ọkhua-eni o li ẹ te. O kha da kpẹsẹ
 ukhuli, ni o rọ ke ta ebe ne, lẹsẹ khi okasẹ o keḅe
 ya le. 29 A kha da gbo li lighọ mẹ khi eni emhi ena
 khi a da mẹ wẹ ne, lẹsẹ khi egheghe o she ramhi.
 30 Abi o li mhi li gue ọli ẹ yẹ ẹ khi, ẹgbọ eghuo ni e
 la agbọ memena ẹa ya ghu ne, ni eni emhi ena nya
 e rọ bhale ya tṣe. 31 Eke ali ukhuli e ya doṣe, ama
 ingmemhi eyemhe ẹa ya tigbe doṣe ghue.

Ogbọkhọghuo ọa lẹsẹ oni ogbeḅe wẹẹ oni egheghe
(iMat 24.36-44)

32 “Ogbọkhọghuo ọa lẹsẹ oni ogbeḅe wẹkhi oni
 egheghe. Ghe egbegbi igeni ena iloghie ali mhemhe
 Omi ọli, sẹ ni Itamhe lolighuo.* 33 A ri ukpẹloe shi
 eke ke tokpẹ, itobọ khi waa lẹsẹ egheghe ni ọ la ya
 bhale. 34 Eri ona o li abi omọse ni ọ vu asha obini
 odonue, ni ọ ri ighumha eyọli shi apfe e ri ukpẹloe

† 13:24 Li zẹ Aza 13.10; Ezik 32.7; iJoẹ 2.10,31; 3.15; Iro 6.12

‡ 13:25 Li zẹ Aza 34.4; iJoẹ 2.10; Iro 6.13 § 13:26 Li zẹ iDan

7.13; Iro 1.7 * 13:32 Li zẹ iMat 24.36

khu shi na lue. O gueye ogbogbo akanya ni o ya gbe. O gueye oni o khe ekhe o ke khe ekhe apfe.†

³⁵ “Irarigho, ke khe ekhe, itobo khi waa lese eghẹghẹ ni oga o ro ya jele. Ini elogbomhi lo o, okekhi itsotso ogbie lo o, okekhi eghẹghẹ obili-atso lo o, abi khi ogbie-fiefie lo. ³⁶ Ini o bhale guo, khi ze ni o bhale ya e khi u wa lese a. ³⁷ Abi mhi li gue oli ye e ena mhi li gbo gueye ogbokpa. ‘A ke khe ekhe!’”

14

Ugbamhi ni a gba khe iJesu

(iMat 26.1-5; iLuk 22.1-2; iJon 11.45-53)

¹ O ke kpe ogbele eva le ni a ro ya li ukpe iPasova ali ukpe ni a la le ibuledi ni aa ri ifuma shi nye, ighie eyi ekpodalo-ugamhi ali esese Ishi eyi iMosisi, ee nono ode ni e te ya bena mu iJesu gbe-a.* ² E egbe, “Awa khi riele oli ini a li imu, onyaghu o ya lasele shi o.”

A la iBetani ku oili shi iJesu egbe

(iMat 26.6-13; iJon 12.1-8)

³ Abi iJesu o ro la eoli iBetani, owa oyi iSamọ ni efafe e kpe mu shitọ le eminale, okpotso oghuo o rue ukoko ituale ni o lolo ghale, ni o pfie lasele. O gbe oni ukoko a, o ku oni ituale shi iJesu ukhomhi.†
⁴ Egbọ eghuo ni e la agho, e ri elemhi ibibi lie egbe, “Elo o ze ni a ro na pfuẹchẹ oni ituale kua shi afue?”
⁵ A kha ri oli de ramhi ifata ukpe ali emhi, a kemhi eni ikpagho na eni ea mhue. E shi oni okpotso unu egbegbo.

† **13:34** Li ze iLuk 12.36-38
 Li ze iLuk 7.37-38

* **14:1** Li ze Okiali 12.1-27 † **14:3**

⁶ Ama iJesu ọ́ọ́ wẹ, “A zẹ ọ́li ọ́bọ. Elo a yẹsẹ ọ́li ẹ ngme shi? Egbeḡhe emini o ti ni o somhi otse ọ́ riẹlẹ na mhe. ⁷ Egheḡhe kpa eni ẹa mhuẹ e rọ nu ẹ la ana, ẹḡheḡhe ni o ghọle ẹ kpa a kpaghiẹ wẹ ọ́bọ. Ama aa ya mẹ mhe ẹḡheḡhe kpa.‡ ⁸ Emini ọ́ doḡe ya riẹlẹ ọ́ riẹlẹ egho. Eri ọ́ ku ituale ku mhe egbe shi eke khe ẹḡheḡhe irotọ oyemhe. ⁹ Iḡesikia mhi gue ẹ ye ẹ khi, ashashini a da la tse abọ usomhi onete eke agbọ ona nya ne, a ya yele emini ọ́kpotso ọ́na ọ́ riẹlẹ le.”

Ijudasi ọ́ lama khi loḡi ya ri iJesu de

(iMat 26.14-16; iLuk 22.3-6)

¹⁰ Egheḡhe agho iJudasi Isikaroti, ni ọ́ khi ọ́tuoghwo eniye odukhokho ogbava, ọ́ lẹ deba ighie eyi ekpodalo-ugamhi, ni ọ́ ya ri iJesu na wẹ de. ¹¹ Onana ni ọ́ gueye wẹ, o ga ghọle wẹ. E shobọ khi wewe e ya ri ikpagho na li. Igho iJudasi ọ́ li nono ẹḡheḡhe ni ọ́ ti ni ọ́ rọ ya mẹ asha ri iJesu na wẹ.

Ijesu ọ́ nu eniye odukhokho eyoli le Eminale iPasova

(iMat 26.17-25; iLuk 22.7-14,21-23; iJon 13.21-30)

¹² Ogbeḡe ni odode ni a li oni ukpe ni a la le ibuleḡi ni aa ri ifuma shi nye o ramhi, ni o khi ogbeḡe ni a rọ gbe ozele Osumha oyi oni iPasova-a, eniye odukhokho eyi iJesu e mhila li “Ashi o ghọle ẹ ni anye mu egbe shi eke ne, ni u la le eminale iPasova?”

¹³ Igho, ọ́ ghie eniye odukhokho etuava eyoli, ọ́ọ́ wẹ, “A lo ifuapfe, omose ni ọ́ tsua ubene amẹ, ọ́ ya lona ẹ ode. A deba li je apfe. ¹⁴ A gueye oni ọ́ mholi apfe ni ọ́ ya lo, khi, ‘Oseḡe ọ́ọ́, anye mhile u ri

‡ 14:7 Li zẹ iDeut 15.11

anye khaṣe elemhi owa ni loli ali eniye odukhokho eyeluṣe wewe e la ya le eminale iPasova? ¹⁵ O ya re e khaṣe agbala ni emhi nya e gba shi ukhomhi owa atonga, a muno egbe shi akaghona awa.”

¹⁶ Eni eniye odukhokho e vu, e lo ifui apfe, e ya me eni emhi tee abi iJesu o gue oli ye we. Igho e mu egbe oni eminale iPasova.

¹⁷ Ogbomhi o mu eke, iJesu ali eni eniye odukhokho ogbava e bhale. ¹⁸ Abi e li shito gase itebu le eminale, iJesu oḍo we, “Egbegbi-ingme mhi gue e ye e khi otuoghwo elemhi e o ya re mhe de. Oni o nu mhe le emhi memena.”§

¹⁹ Udu o yese we-a, otuoghwo-oghwo oḍo mhila li, “She khi oḍa khi mhemhe o khi?”

²⁰ O so we o, oḍo we, “Otuoghwo elemhi ee ogbava o ya khi, oni o ga ri ibuledi nu mhe e somhi elemhi utasa memena. ²¹ Eri Omi Ogbọ o ya ghu-a abi a li keke oli shi eke na li. Eri-tse khi, o maa kholo oni o ya roli de egbe! O kha ga ti ne, ini ogbọ oḍa bie bia li lo!”

Eminale oyi Onomhue

(iMat 26.26-30; iLuk 22.14-20; 1 iKori 11.23-25)

²² Abi e li le eminale egho, iJesu o rue ibuledi, o kphemhi, o khi oli a, o ro na eniye odukhokho eyoli, oḍo, “A mo le; Idiegbe oyemhe na.”

²³ Igho o gbo so onyo shi uko, o kphemhi, o roli na we, wewe nya e ga te o da.

²⁴ IJesu oḍo we, “Olia eyemhe na ni e migha shi ishiobo onogbo, ni a ku kua na ebubu egbo.* ²⁵ Mhi gue igesikia ye e khi mhi aa ke gbo ya rote onyo

§ **14:18** Li ze Iwolo 41.9 * **14:24** Li ze Okiali 24.8; iJere 31.31-34

upfonu ona da, se ni obini Eghiele oyi Eshinegba, ni mhi la da onyo onogbo.”²⁶ Abi e ro to uwolo se, e fie lasele, e je Ute Eera olivu.

*Ijesu o guele shi eke khi iPita o ya kie lue
(iMat 26.31-35; iLuk 22.31-34; iJon 13.36-38)*

²⁷ Ijesu o o we, “Ee nya, a ya na kua, a ze mhemheghuo obo, irari khi a she keke oli shi Ebe-no-pfuase khi.

“ ‘Mhi ya ri emhi li
orisumhafia,
isumha e ya ve kua.’†

²⁸ “Ama ini a guise mhe le se, mhi ya ralo khe e iGalili.”‡

²⁹ IPita o o li, “Ini egbo nya e rirife kie e, mhi aa ya kie e.”

³⁰ Ijesu o o iPita, “Mhi gueye khi, neni okpa o o gbieghe iteva amiose, u ya kie mhe itese.” ³¹ IPita o kie gema o gue gagaga, o lie, “Ini o ri rife khia khi oni mhi la nu e ghu-a lo, mhi aa ya tigbe kie-e.” Enekpole nya e li ngme gho.

*Ijesu o la iGetisemani so iromhi
(iMat 26.36-46; iLuk 22.39-46)*

³² E je ashini a lu iGetisemani, ijesu o o eniye odukhokho eyoli, “A shit o ana ni mhi ya so iromhi bhale.” ³³ O rue iPita ali iJonni ali iJemhisi ma egbe vu. Iyesudu-a ali anasemhe e bhale na li. ³⁴ O we, “Oya ni o la mhe udu memena o gba a. O ga nono ni lue gbe mhe. A migha akana khe mhe, a ke tokpe.”

³⁵ O ti je odalo deno, o de ya yeshi eke, o o so iromhi ini o ya ze rife ni oni eghenge ona o dose

† 14:27 Li ze iZaka 13.7 ‡ 14:28 Li ze iMat 28.16

lue. ³⁶ Ọ́ọ́, “Itamhẹ, Itamhẹ, emhikpa o zẹ ẹ riẹlẹ. Rue mhẹ oni uko osoli ona odalo le. Eri-tşẹ khi, ọa khi abi o ghọle mhẹ, sẹẹ ni abi o li ghọle ẹ.”

³⁷ Abi ọ nyenẹ egbe bhale, ọ mẹ khi eni eniyẹ odukhokho e lese-a. Ọọ iPita, “ISamọ, eri u lese-a? Aa dobe nu mhẹ tokpe ukuku eghẹghẹ tşẹ? ³⁸ Ri ukpeloe shi ekẹ gboo ke sọ iromhi ini u khi de ini u mhọli imufe. Ayemhẹ oye o mu egbe ni o rọ riẹlẹ, eri-tşẹ khi, idiegbe oye ọa dobe.”

³⁹ Ighọ ọ gbo vu ya sọ iromhi enabi ọ kpe sọ. ⁴⁰ Abi ọ rọ nyenẹ egbe bhale, ọ gbo bhale ya ẹ wẹ khi e lese-a, irari khi olese o la wẹ alo, ẹa lese abi e ke ya ngme ọli.

⁴¹ Abi ọ rọ nyenẹ egbe bhale utonuzese, ọọ wẹ, “Olese a kie la, ni a yemhẹ-a? Olese oghọ o she bu ẹ! Oni eghẹghẹ o she ramhi. A bino khe khi, a ri Omi Ọgbọ na ena olamhẹ de. ⁴² A vule ni awa vu! Oni ọ remhẹ de ọọ bhale ena!”

A mu iJesu

(iMat 26.47-56; iLuk 22.47-53; iJón 18.3-12)

⁴³ Abi ọ li ngme, iJudasi, ni ọ khi ọtuoghwo elemhi eni eniyẹ odukhokho ogbava ọ bhale. Egbọ ni e tsua itsua okhọli ali itakobi ali ikpokpo, ni ighie eyi ekpodalo-ugamhi, ali esese Ishi eyi iMosisi ali egbhali e ghie, e nu ọli bhale.

⁴⁴ Oni ọ roli de ọ she kpe gweye eni e nu ọli kia, ọọ wẹ, “Oni mhi da pfipfi ekphamhi ne, lolli ọ khi oni a nono. A mu ọli, a khe ọli ekhe rue vu.” ⁴⁵ Abi e rọ lese lole, iJudasi ọ le deba iJesu, ọọ, “Ọsese.” Ọ pfipfi ọli ekphamhi. ⁴⁶ Eni emose e mu iJesu. ⁴⁷ Ighọ ọtuoghwo eni e migha epfe-aghọ ọ ji itakobi oyoli

emhi lasele, ọ bẹ oghumha ọyi Ọga ọyi ekpodalo ugamhi esọ-a.

⁴⁸ Ijesu ọọ wẹ, “Okhọli mhi tsua, ni a rọ lina tsua itsua okhọli ali itakobi ali ikpokpo bhale ya mu mhe? ⁴⁹ Ogbẹle kpa mhi rọ nu ẹ la, mhi la Owa ọyi Ẹshinegba ẹ sẹsẹ. Aa mu mhe. Eri a mẹ emhi ena ni emini a keke shi Ebe-no-pfuase o bhale ya tse.” §
⁵⁰ Igho eniye odukhokho eyọli nya ni e deba li e ve kua, o kpe loughuo le.

⁵¹ Ozeo oghuo ni ọ sọ awulu ona yeyeye, ọọ deba ijesu. Abi e rọ to obọ sọ li, khi wewe e ya mu ọli, ⁵² ọ nyanọ awulu-a mhue wẹ abọ, ọ ri irumheba na vu.

Otu iSaediri e ri ijesu gue ezọ

(iMat 26.57-68; iLuk 22.54-55,63-71; iJon 18.13-14,19-24)

⁵³ E mu ijesu bhale owa ọyi Ọga ọyi ekpodalo ugamhi, ighie eyi ekpodalo-ugamhi nya, ali eghali ali ekekebe ali esese Ishi eyi iMosisi nya e le gba. ⁵⁴ IPita ọ tapfia deba li ukhu-khokho, ya ramhi elemhi apfe ọyi Ọga ọyi ekpodalo ugamhi. Ọ nu eni ẹ khe ekhe shito khasẹ erali.

⁵⁵ Eni ighie eyi ekpodalo-ugamhi ali oni igbaa ọyi iSaediri nya, e nono emhi ushi ni e ya mu mhọli ijesu obọ, ni e ba mẹ asha gbe ọli-a. Ẹa mẹ emhikhoghuo. ⁵⁶ Ebubu egbo e pfi ọtsele eyi egbhọli mu ọli, eni ọtsele nya, ẹa de shi oghuo.

⁵⁷ Ikpukhokho, egbo eghuo e vule pfi ọtsele egbhọli ona mu ijesu. Ẹẹ, ⁵⁸ “Anye suọ khi ọọ lie khi, ‘Mhi ya guoghọ Owa ọyi Ẹshinegba onana ni egbo e ri abọ ma-a, ẹle-ese mhi to olese ni egbo ẹa ri abọ

§ 14:49 Li zẹ iLuk 19.47; 21.37

ma.’ ”* 59 Abi e rię kie ngme ona, ọtsele eyewe ęa kie de shi oghuo.

60 Igho Ọga ọyi ekpodalo ugamhi ọ vule migha odalo oyewe nya, ọ mhila iJesu. “Waa bie ya sọ we ọ? Ezo elọ na ni egbo ena ęę gue shi ę egbe?” 61 Ama iJesu ọ tsaghie a, ọa sọ we ọ. Ọga ọyi ekpodalo ugamhi, ọ gbo mhila li, “Ye ye u khi Omiepfuese, Omi Eshinegba ọna Kuęhie?”

62 IJesu ọọ li, “Lọli mhi khi. E ye nya a ya me khi Omi Ọgbọ ọ shito obita ọyi Eshinegba ni ọ fune, ali khi ọ la otughunu rote irarogbe ę tiemhie.”†

63 Ọga ọyi ekpodalo ugamhi ọ nyanọ itsua shi egbọli uruli abi ọ li yila. Ọọ, “Awa ke gbo nono ọtsele olese. 64 E ye nya a she suọ abi ọ pfi unu-a deba Eshinegba. Se a sọ shi ọ?”

We we nya e pfa ezọ mu ọli khi ọni a gbe-a ọ khi.‡ 65 Egbọ eghuo ọ, e tonon ete ku ọli. E ri emhi genọ ọli alo. E pfi ọli emhi, ę ọli, “Me eke guele, gueye anye ọni ọ pfi ę emhi?” Eni ę khe ekhe e mu ọli, e lase ọli esọ.

IPita ọ khi lọli ęa lese iJesu

(iMat 26.69-75; iLuk 22.56-62; iJon 18.15-18,25-27)

66 Abi iPita ọ kie shito elemhi apfe egho, omueshi oghuo ni ọ khi ọni ọọ ga ọyi Ọga ọyi ekpodalo ugamhi ọ bhale. 67 Ọ me iPita abi ọ rokhasẹ erali, ọ toli okpe tsuke.

Ọọ li, “Ye ye u li nu iJesu na iNazareti i kia.”

* 14:58 Li ze iJon 2.19 † 14:62 Li ze iDan 7.13 ‡ 14:64 Li ze iLev 24.16

⁶⁸ Ama iPita o tia. Oo, “Mhi a lese emini wa ngme.” O lase agho le je ode ni a te e lo elemhi apfe. [Igho okpa o gbieghe.]

⁶⁹ Abi oni omueshi ni o ga ogbo ogbo o ro gbo me iPita agho, o gbo riefe eni ingmemhi ngme khase eni e migha epfe agho. Oo, “Otuoghwo elemhi we, oni omose ona o khi.” ⁷⁰ IPita o gbo tia.

Oo li dena, eni e migha epfe agho e ke iPita, “Igesikia lo khi otuoghwo elemhi we u khi, irari khi onge iGalili u khi.”

⁷¹ Igho o li se egboli isheli, o romhi eni isheli. O lie, “Mhi aa ga lese omose ona ni a ngme ena.”

⁷² Utoghwoke, okpa o gbieghe utonuzi-eva. IPita o sato emini iJesu o gueye oli khi, “Neni okpa o ya gbieghe utonuzi-eva, u ya kie mhe itese.” Igho o gbe akhe evie a.

15

A rue iJesu bhale odalo oyi iPaleti

(iMat 27.1-2,11-14; iLuk 23.1-5; iJon 18.28-38)

¹ Eluzogbe fiefe, ighie eyi ekpodalo-ugamhi, ali egbhali ali esese Ishi eyi iMosisi ali igbaa eyi iSaediri nya, e ye ugbamhi. E ge iJesu rue vu ghi iPaleti.

² Oni iPaleti o mhila iJesu ogbo, oo li, “Oghie oyi egbo iJu u khi?”

IJesu oo, “Eee! Igho lo abi u ngme oli.”

³ Eni ighie eyi ekpodalo-ugamhi eyi Eshinegba e ga gue ezo emhi ebubu shi iJesu egbe. ⁴ Igho iPaleti o gbo mhila li ogbo, oo, “Wa ya pfunu, u suo iwali ezo ni e gue e shi e egbe?”

⁵ Ama iJesu oa so li o. O ri abo sha iPaleti.

*A pfa ẹzọ mu iJesu a ka gbe ọli a
(iMat 27.15-26; iLuk 23.13-25; iJọn 18.39--19.16)*

⁶ Abi áá li ini o lina ramhi ẹghẹghẹ ukpe iPasova, eri iPaleti ọ rue ọgbọ ọghuo owa ighumha lasele na wẹ abi o ghọle wẹ shi. ⁷ Ẹghẹghẹ aghọ ọmọse ọghuo ni a lu iBarabasi ọ la owa ighumha, ni ọ khi ọghuo ẹgbọ ni a mu. Eri a mu ọli shi ugbeli ni ọ gbe ẹghẹghẹ ni a rọ mẹ onyaghu. ⁸ Abi eni ẹgbọ e rọ bhale gbii ya mhila iPaleti ọ riẹlẹ emini ọ kie kpẹ riẹlẹ na wẹ, ⁹ iPaleti ọ mhila wẹ, ọọ, “A nono ni mhi rue oghie iJu abọ a na ẹ?” ¹⁰ Ọ ga lẹsẹ gboo khi itobọ ibiselemhi, ighie eyi ekpodalo-ugamhi e rọ mu iJesu ghi luẹ. ¹¹ Ama ighie eyi ekpodalo-ugamhi e sẹsẹ ẹgbọ e gueyẹ iPaleti ọ ri ochoghọ wolo iBarabasi obọ a na ẹwẹ.

¹² iPaleti ọ mhila wẹ, ọọ, “Elo mhi kẹ li ọni a lu oghie iJu shọ?”

¹³ E tsẹsẹ leghe, “A ta li ma ọara apfida.”

¹⁴ iPaleti ọ mhila wẹ, ọọ, “Elo o zẹ, umha-guekia onoghuo ọ riẹlẹ?” Ama eena e tsẹsẹ nẹ, “A ta li ma ọara apfida!”

¹⁵ Ni ọ rọ riẹlẹ emini oo ghọle eni ẹgbọ, ọ wolo iBarabasi abọ-a na wẹ. Ọọ e gbe iJesu itẹ, ọ rue ọli na wẹ e ka ta li ma ọara apfida.

*Ekhọli-okhuẹ e ri iJesu li egia
(iMat 27.27-31; iJọn 19.2-3)*

¹⁶ Eni ekhọli-okhuẹ e rue iJesu lo elemhi apfẹ agbala oyi igovunọ. E lu ekhọli-okhuẹ apfẹwẹ eni e kpọle. ¹⁷ E ri awulu ichẹ ni o khi ẹgholi ibulu, sọ li, e ri igba do arula rughu ọli ukhomhi. ¹⁸ E liẹ ọli, “A da abọ na oghie ọyi ẹgbọ iJu!” ¹⁹ E pfino ọli ukpokpo ukhomhi iti ingmi-ingmẹ, e tono etẹ ku

ọli. E de ya wugha li odalo, e nyese ukhomhi na li. ²⁰ Abi e ro ligho ri iJesu li egia se nya, e gueghie ọli oni awulu ichẹ ni o khi egholi ibulu ogho, e nyene egbe ri itsua eyoli so li. Igho e rue ọli vu ya tama ọara apfida.

A ta iJesu ma apfida

(iMat 27.32-44; iLuk 23.26-43; iJon 19.17-27)

²¹ Abi e ro le, e ya e omose oghuo ni a lu iSamọ ni o rote ode oyoli dose, ni o rote asha jele. Igho eni ekholi-okhue e ri itoto mu ọli o tsua ọara apfida oyi iJesu. ISamọ ongi iZireni o khi, o gbo khi ita Alezada ali iRufosi.* ²² E rue iJesu bhale ashini a lu iGogota. [Ugua ukhomhi olimhi a ri iGogota ngme] ²³ A ri onyo ni a ku ikhumhi na lui Imari shi na li o ro da, ama ọa lama da li. ²⁴ E ta li ma ọara apfida. E kemhi itsua ni o so mholi egbe abo. E ti ebe ro kemhi eni ide eyoli, ni e lese oni o ya te ogbogbo.†

²⁵ Eghẹghẹ agogo itili eluzogbe a ro ta li ma ọara apfida. ²⁶ Emini e keke ro kphase oni ọara apfida kpeda na li khi. Oghie Oyi Egbọ iJu. ²⁷ E li gbo ta ighiatọ etuava ma ọara apfida mama li, ọtuoghuo o la li obo-ita, onokpọle o la li obogobo. ²⁸ Ona o ri emini a keke shi Ebe-no-pfuase bhale ya tse, ni ọọ, “A leli ọli ma ighiatọ.”‡ ²⁹ Egbọ eni e te epfe agho dose, e pfi itsue manya iJesu, ee nighise ukhomhi, e lie, “Ebanẹke! Yeye ni u ya guoghọ Owa oyi Eshinegba-a, u gbo riele o to ogbele ese.§ ³⁰ Ro te ọara apfida tiemhie sho ya mie egbe e pfuese.”

* **15:21** Li ze iRom 16.13 † **15:24** Li ze Iwolo 22.18 ‡ **15:28** Li ze Aza 53.12 § **15:29** Li ze Iwolo 22.7; 109.25; iMak 14.58; iJon 2.19

³¹ Igho ighie eyi ekpodalo-ugamhi, ali esese Ishi eyi iMosisi e li ri iJesu li egia, e lie egbe we. “O mie egboese pfuese, ama o dobe mie egboli pfuese. ³² A ze ni oni Omiepfuese ona, ikhi oghie iZireni, ni o rote oara apfida tiemhie ni awa me, ni awa mie oli suo.” Eni a li ta ma oara apfida mama li, e ga li nu we tsue oli.

Eghuli oyi iJesu

(iMat 27.45-56; iLuk 23.44-49; iJon 19.28-30)

³³ Agogo igbeva oguota, obili o bi oni eke a nya. Elemhi iwakati ese oni obili o la ogbe ramhi.

³⁴ Agogo ese o ramhi, iJesu o tseşe leghe, o ri unu eoli oyewe lie, “Eloi, Eloi, Lama Sabachi tani?” Em- ini a ri ona ngme khi, “Eshinegba oyemhe, Eshinegba oyemhe, elo o ze ni u ro tsua mhe pfia.”*

³⁵ Abi egbo eghuo ni e migha epfe agho e ro suo khi o ngme na, e ke, “Ri esọ shi eke khi o lui Elaja.”

³⁶ Omose oghuo elemhi eni egbo o na ya rue isoso so li onyo ni okhe a, o ge oli shi ukpokpo roli kpe iJesu unu o ro da. Oni omose o ke. “A ze oli obo, ni awa me ini Elaja o ya bhale ya rue oli ukhomhi oara apfida tiemhie.”†

³⁷ IJesu o tseşe leghe, o ghua.

³⁸ Ukpokpomhi ode ugbakpi ni a ro pfa ode-a shi elemhi Owa Oyi Eshinegba, o rote idane kiese-a asha eva ya to eke.‡ ³⁹ Abi okholi-okhue oniemhi ni o migha odalo oni oara apfida o ro suo abi iJesu o tseşe leghe, ni o ro me abi o li ghua, o o, “Egbegbo lo khi, Omi Eshinegba omose ona o khi.”

* **15:34** Li ze Iwolo 22.1 † **15:36** Li ze Iwolo 69.21 ‡ **15:38** Li ze Okiali 26.31-33

⁴⁰ Ikpotoso eghuo e ta pfia bino, iMeli ɔnge iMagidaleni, ali iMeli inyi iJemhisi ɔni ɔ kpɔkɛ, ni ɔ gbo khi inyi iJosisi ali iSalome. ⁴¹ Ikpotoso ena e mema deba iJesu ni e ri ukpɛloɛ khu ɔli obini iGalili. Ikpotoso elese ni e deba iJesu bhale iJerusalemu e li ga migha agho. §

Irotɔ oyi iJesu

(iMat 27.57-61; iLuk 23.50-56; iJɔn 19.38-42)

⁴² Ogbɔmhi o she mu eke ɛlɛgho ni o khi ɛlɛ ni a ro mu egbe khe ɛlɛ iyemheɔ oyi ɛgbɔ iJu. ⁴³ IJosefu ɔnge Arimatia, ni ɔ khi ɔghuo eni ɛ mhese, ni ɔ khi ɔgbɔ ni ɔ li mu ɛloɛ. Eri ɔ bie kpɛ ri ɛloɛ shi eke khe Eghiele oyi ɛshinegba. ɔ gbe udu lɛ ya gueye iPaleti o rue olimhi oyi iJesu na luɛ ya to. ⁴⁴ O ga sha iPaleti abo khi iJesu ɔ she gbhe ghɔ keke ghua. ɔ lui ɔni ɔkhɔli-okhue ɔniemhi ɔgho mhila ini iJesu ɔ she gbhe ghua. ⁴⁵ Abi iPaleti ɔ ro rote unu oyi ɔni ɔkhɔli-okhue ɔniemhi ɔgho suo khi igho o khi egbegbo, ɔ tsua olimhi oyi iJesu na iJosefu. ⁴⁶ Igho iJosefu ɔ de ide, ɔ rue ɔni olimhi tiemhile ɔara, ɔ khuli ɔli, ɔ ri ɔli to uji ni a to shi eche. ɔ gheghele eche ɔniemhi guese oni uji. ⁴⁷ IMeli ɔnge iMagidaleni, ali iMeli inyo iJosisi e me ashini a ri ɔli to.

16

Irote eghuli guale oyi iJesu

(iMat 28.1-8; iLuk 24.1-12; iJɔn 20.1-10)

¹ Abi ɛlɛ iyemheɔ o ro dose se, iMeli ɔnge iMagidaleni, ali iSalome, ali iMeli inyi iJemhisi, e de afu ituale ni ee pfiɛ mhue obo ni wewe e ya khakha li

shi idiegbe olimhi oyi iJesu. ² Ogbie-fiefie ni o khi uka, khi ovọ o lese ngale, e je atalimhi ni a roli to. ³ Igho e mhila egbe we, “Oghuo o ya gheghele eche unu oni atalimhi-a na awa?”

⁴ Ama abi e ke ro yase alo eke bino, e me khi a she gheghele oni eche ni o gho gbedi unu oni atalimhi-a a. ⁵ Abi e ro lo oni uji, e me ozeo ni o so itsua epfopfo na dogo, khi o shito epfe obita. O sha we abo.

⁶ Oo we, “Abo e khi sha e.” “Ijesu onge iNazareti oni a ta ma oara apfida a nono? O she te eghuli guale. Oa la akana. Ghe ashini a roli to. ⁷ Ama a ke vu, a ka gueye eniye odukhokho eyoli ali iPita khi, ‘O she ralo iGalili e khe e. A ya bhale ya e oli shi agho abi o kie kpe gueye e.’ ”*

⁸ Eni ikpotso e lasele, e na ya je apfe. Abo e sha we, ulishi oo mu we, ea nu ogbokhoghuo ngme irari khi ulishi o mu we.

[Ebe eni odode eghuo eni a rote keke oni Usomhi Onete ona, ea mholi odada 9-20 oyi ukhomhi 16 ona.]

*Ijesu o ri egboli khase iMeli ongi iMagidaleni
(iMat 28.9-10; iJon 20.11-18)*

⁹ Abi ijesu o ro rote eghuli guale ele uka se, o ri egbe oli kpe khase iMeli onge iMagidaleni, oni ijesu o khu ayemhe ebe ishilua rote egbe ya fie. ¹⁰ O vu ya gueye apfe ijesu ni ee vie. ¹¹ Abi e ro suo khi ijesu o she guale khi o la agbo ali khi iMeli ongi iMagidaleni o me oli, ea mie shi oli o.

*Ijesu o ri egboli khase eniye odukhokho aava
(iLuk 24.13-35)*

* **16:7** Li ze iMat 26.32; iMak 14.28

¹² Abi a rọ mẹ ona se, iJesu ọ rọte ode ọdọda ri egbọli khase ẹwe aava abi e li lo elemhi oni ẹoli. ¹³ E nyene egbe jele, e gbo gueye eniye odukhokho ni e kpole, ama, ẹa gbo li mie shi wẹ ọ.

Ijesu ọ ri egbọli khase eni eniye odukhokho ogbaghuo

(iMat 28.16-20; iLuk 24.36-49; iJon 20.19-23; Ika 1.6-8)

¹⁴ Ikpukhokho, iJesu ọ ri egbọli khase eni eniye odukhokho ogbaghuo abi e rọ le eminale. Ọ dese wẹ shi umha-mhọli irudunga oyewe, ali umhano ni e mie shi emini eni e mẹ lue e ngme abi ọ rọ guale se.

¹⁵ Ọọ wẹ, “A lo elemhi eke agbo nya, a ke gue usomhi onete oyemhe ye ogbokpa.† ¹⁶ Ọnini ọ da mie ẹ suọ, ni a da batazi ne, ọ ya mhọli imiepfuese, ama ọni ọa da miesuọ, a she pfa ẹzọ mu ọli. ¹⁷ Ọlele ona o ya ke deba eni e miesuọ, e ya ri eva oyemhe khu ayemhe ebe kua, e ya ngme emue onogbo unu. ¹⁸ E ya ri abọ eyewe mu enye eke, ini e rie rue ikhumhi ni ọọ gbe ogbo da, ọa ya li wẹ abikhoghuo. E kha ri abọ nga eni ẹ ghua egbe, e ya toto.”

A rue iJesu nga obini iloghie

(iLuk 24.50-53; Ika 1.9-11)

¹⁹ Abi iJesu Ọnọmhue ọ rọ nu wẹ ngme se, a rue ọli nga idane iloghie. Ọ shito ukiekie obita oyi Eshinegba.‡ ²⁰ Igho eniye odukhokho eyi iJesu e li fie ya tse abọ oni usomhi onete gasẹ asha kpa. Igho Ọnọmhue ọ rẹ wẹ gbe ikanya, ọ ri ikanya ọnyaloa ni e gbe ri ungmehi oyọli tse.

† 16:15 Li zẹ Ika 1.8 ‡ 16:19 Li zẹ Ika 1.9-11

Ebe-No-Pfuasę Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 21 Feb 2024 from source files
dated 29 Jan 2022

03be06b0-68fd-500b-b9a9-6bca4b63979a